

東
華
續
錄

東華續錄

咸豐六十二

臣王先謙敬編

臣陶濬宣恭校

秋七月丙辰朔諭軍機大臣等昨因江西饒郡失守廣信危急諭王懿德等將張從龍陳上國所帶各兵飭赴建昌廣信防剿並諭由閩續調官兵迅速馳往向榮軍營茲據該督等奏順昌九龍山土匪糾合江西汀廣奸民分股滋擾調赴江右援兵未敢驟撤藩籬等語閩省江西毗連地面本有督糧道王訓等在彼督辦防務見雖有匪徒覬覦而滋事未久如果實力圍捕當易撲滅該督已另調省標及各營兵一千名派遊擊蘇遇春等管帶前往順昌協剿著卽責成王訓金萬清妥爲調度迅掃賊氛其張從龍陳上國之兵著仍遵昨降諭旨令赴建昌廣信分投防剿該處距閩不遠

亦可牽制賊勢爲順昌等處聲援至琳潤等所帶兵勇及續諭添調兵二千名仍當迅速抽赴向榮軍營俾資勦辦將此由六百里諭令知之○以克復安徽涇縣城予遊擊周天受以副將補用○予安徽陣亡知縣張學襄等祭葬世職○丁巳諭軍機大臣等向榮奏連日攻勦逆匪焚毀賊壘獲勝並請將鄭魁士傅振邦飭調一員前往江南等語逆匪撲犯丹陽並繞往東南蔓延結壘意在包鈔我軍營盤經向榮派兵日夜轟勦焚毀鳳凰岡賊壘一座我軍聲威稍振惟逆數尙多內犯之路處處可虞該大臣布置各情雖尙周妥究恐賊眾兵單不敷分布前有旨諭英桂飭傅振邦帶兵馳往江南助勦據該撫奏稱陝西綠營官兵一千名黑龍江餘丁五百名業經先後啟程嗣又抽撥西安馬隊千名交傅振邦督帶並飭該鎮於原帶官兵內抽撥帶往復諭和春等挑選馬步官

兵一千六百名連前次所派之四百名湊足二千名卽日前赴丹陽所有皖豫各兵當可陸續趕到該大臣卽可隨時布置張從龍陳上國所帶閩兵因江西剿賊喫緊赴建昌廣信分投防剿已諭王懿德飭催琳潤等及禧祿所帶兵一千四百名飛速馳往江南並諭令添派兵丁二千名一併交向榮調遣矣該大臣扼守丹陽雖屢挫兇鋒而句容之茅山薛埠丹徒之寶堰等處皆可徑至常州無須經過丹陽況宜荆太湖水路分歧並可直達蘇浙內竄之路幾於防不勝防該大臣惟當嚴飭明安秦秦如虎等實力防剿並遵疊次諭旨激勵兵勇相機進剿勿得株守一隅致誤全局浙省護運火輪船已據何桂清奏調入江復派員赴上海購募並諭怡良趙德轍將滬商護運之火輪船迅速派委妥員督帶入江統歸該大臣調度此項輪船駛入大江卽著向榮妥爲布置如能肅

清江面亦可牽制賊勢將此由六百里加緊諭令知之○予江蘇陣亡參領凌保等祭葬世職○戊午諭內閣葉名琛柏貴奏查明革員家產請旨辦理等語已革江蘇蘇松太道吳健彰被參各款業經怡良等查明奏結所有該革員原籍貲財家產著卽發還○諭和春福濟奏皖省軍需匱乏墊款一時難補請飭在徐屬地丁銀內扣還等語皖省製造局向在徐州辦解一切軍裝均由該道墊支除疊次截留皖餉充抵歸款外尙欠還銀二萬七千餘兩著准其在於徐屬應解地丁銀內照數扣留以歸欠款嗣後地丁銀兩仍不准率請扣留抵充○以永定河北岸漫溢桂良下部議處○己未何桂清奏近日傳聞向榮福興共事不似從前融洽且福興與張國樑又不相能兵勇亦多不服臣初不敢信及密詢營中來者眾口一詞雖皆爲公並無嫌隙而不能和衷共濟已可概見

茲又見怡良寄許乃釗函稱彭玉雯催餉來常述及福興張國樑意見參差將士無所適從屬許乃釗前往婉爲開導否則於大局有礙等語伏查向榮威望素著屹然爲東南保障者歷有年所而其所倚爲左右手者則惟張國樑而已張國樑仰蒙 皇上拔擢之恩實能奮不顧身感激圖報百戰之餘殺賊無算賊尤畏之故四五月間此擊彼竄倏忽靡常無非爲牽掣張國樑之計一聞其往攻溧水遂糾眾數萬徑撲紫金山大營迨張國樑倉卒回援身又受傷而各營盤已多失陷此向榮之所以不得不退守丹陽也其時該匪已全力內犯兵心不免渙散民心尤不免震恐賴向榮速派張國樑總統諸軍帶傷力戰逆黨始不能越丹陽一步是向榮所倚賴賊匪所畏懼兵勇所悅服以及江浙兩省官紳士民所仰望者實不過張國樑一人今丹陽營盤三十餘座業經紮定張

國樑傷亦漸愈而福興與向榮張國樑各有意見兵勇又不服之若令勉強共事必致無益有礙况福興才具頗優年力正壯此時需才之處甚多如能量移他處自可各盡所長至許乃釗前往開導一節恐貌從心違遇事仍多齟齬即使諸臣共知大義渙然冰釋而萬餘兵勇安能一一開導之使其翕然心服耶萬一眾怒兵譁致生意外之變則大局更不可收拾矣惟有籲求 皇上乾綱獨斷速降諭旨以一事權而消禍患 上諭軍機大臣等朕聞福興近日在營與張國樑不能和衷將士無所適從並聞怡良有函知許乃釗令其前往開導之事軍營將帥不和必致貽誤大局斷非空言開導勉強解釋所能了事自鄧紹夏渡江之後揚營武職正少幫辦大員該將軍才優年壯尙能督帶馬隊若將福興移往江北較爲合宜著向榮卽將福興與張國樑不能和衷之處據實

速奏候旨派調或令福興自統一軍分營防剿尙可藉資得力則不必移往江北卽徽甯等處亦可酌量撥往總期各盡所長不致互相掣肘貽誤大局爲要至丹陽大營見在軍威稍振張國樑總統諸軍向能奮勇若畀以幫辦能否勝任著向榮一併據實具奏當此軍務孔棘全在將帥得人萬不准稍存瞻徇前次諭令查看之余萬清彭玉雯二員亦著一併確查附報奏聞將此由六百里諭令知之○庚申諭內閣官文奏堵剿下游賊援並黃州漢陽剿賊疊獲勝仗一摺武漢逆賊被圍日久密約下游賊黨往援經官文派撥兵勇前往堵截六月初九日行至黃州鵝公頸地方適與賊遇都司王玉琳等分東西兩路迎擊署黃州府知府許廣藻督率團練助戰斃賊千餘名賊眾敗逃復追殺數百名溺死者無數奪獲旗械數百件將軍都興阿等乘勝進攻黃州將城外賊壘焚

燒斃賊百餘名二十一日武昌賊船數十號由襄河口上駛官軍開礮轟擊並縱火焚燒賊船數隻落水死者不計其數維時陸路有賊千餘由米廠河來撲官兵奮力進剿斃賊五百餘名生擒十餘名奪獲馬匹器械多件官文等圍攻武昌漢陽日久無功此次各路雖皆獲勝於克復尙無把握實屬遷延貽誤著該大臣等振刷精神督飭將弁兵勇實力勦辦剋期收復城池不得以小勝仗鋪張搪塞儻再因循觀望國法具在恐該大臣等不能當此重咎也○竇授昇福山東按察使○予湖北陣亡副將駱永忠殉難知府易容之等祭韓世職○辛酉諭內閣葉名琛柏貴奏匪眾竄入和平縣城官兵攻剿克復一摺廣東和平縣地方屢被江西擊敗餘匪及該省河源股匪分投竄擾於上年十二月該匪竄入東門占踞縣城經崑壽督帶兵勇由河源一路進剿屢獲大勝於

五月初五日分三路進攻乘大霧籠罩先將小南門攻破兵勇入城截殺匪眾由東門逃遁計追斃賊匪一千餘名和平縣城被匪先後竄擾見經圍攻克復著葉名琛等仍嚴飭員弁兵勇追擊搜捕無畱餘孽該地方文武雖經隨同克復城池究屬堵剿不力咎無可辭署和平縣知縣候補知縣陳義典史章鑄文護和平營都司守備梁肇慶把總葉志光均著卽行革職以示懲儆其在事尤爲出力人員著該督撫查明保奏○諭葉名琛柏貴奏官軍攻剿江西股匪克復雩都上猶縣城贛州府城解圍一摺江西南贛一帶賊匪肆擾經葉名琛等撥廣東兵勇馳往助剿四月初九日候選從九品孫福同在新城縣赤石塘與匪接仗獲勝殲賊一千餘名將匪巢盡行焚毀五月十四日進攻白鴿橋匪營並將上猶縣城克復潮州鎮總兵壽山於十九日帶兵圍攻雩都縣城用地雷

轟坍城墻斃匪五百餘名當將縣城克復二十二日攻剿贛州城外賊匪擊沈賊船七十二隻餘匪分竄贛州府城圍立解此次廣東兵勇赴援江西克復城池各員弁奮勇接仗尙屬得力兵勇亦能用命著該督等嚴飭各路將弁乘勝進剿疏通江西下游以期迅掃賊氛○諭軍機大臣等德興阿翁同書奏進剿瓜州江浦各情形一摺瓜州賊匪據稱愈聚愈多是其意圖他竄顯而易見德興阿等自應嚴密圍攻卽可杜其旁竄若徒以緩急兩難爲慮必致該匪四出滋擾防不勝防稽延時日江浦地居要衝亦應亟籌克復著德興阿等督飭將士實力攻剿務將瓜州江浦賊眾悉數殲除毋得再涉延緩致該匪竄擾他處陝西綠營兵一千名准其將一半畱於揚營其餘一半卽飭速赴向榮軍營聽候調遣該大臣等請飭已革提督孔廣順前赴揚州已諭令官文將孔廣順能

否前往之處酌量辦理將此由六百里諭令知之○諭本日據德興阿奏浦口爲南北咽喉江北軍營見乏提鎮大員派往專駐請飭派已革提督孔廣順兼程來揚等語孔廣順見在官文軍營該大臣營內帶兵得力大員尙不乏人而江北見無大員可委自屬實情著官文酌度情形如果孔廣順見無緊要差委可以令其前往卽著派令迅速啟程馳赴揚州軍營交德興阿等差委藉資得力將此由六百里諭令知之○予廣西陣亡知府謝邦瑞等祭葬世職○王戍諭軍機大臣等軍機大臣面奏有人呈稱常州見辦團練分廂練勇城關而外未能一律通行辦事之人亦未能盡當其選必須設一專員督辦再擇賢明紳士入局襄理毋得專力城廂遺漏鄉鎮在籍贊善趙振祚辦理團練勸捐已經三載獨力難支擬請飭令已革臬司查文經專司督辦會同趙振祚除破情面

添置紳士必能揆度合府情形次第講求以臻盡善卽抽釐一節亦可加意清查杜其中飽又稱在籍編修呂錦文前任雲南同知陸葆候選訓導楊金監皆深明大義宜延致入局職員曹禾吳容光舉人盛久榮承越生員吳會甲六品軍功吳文瀾皆可分別察委等語常州爲蘇州門戶水陸交衝籌辦團練必須實力經理該府所屬荆溪宜興金匱無錫皆可直達蘇州江陰武進各江口外通大江尤爲險要正宜通籌形勢合力舉行方不至囿於一隅有名無實查文經見在向榮軍營其前任知府時是否民情翕服怡良久住常州自必確有所聞果實在可靠卽著該督等咨商向榮如查文經在營見無經手緊要事件卽調回常州令其專司督辦儻行之有效並可推行各屬不必拘定常屬一處至所舉各紳士其中或辦事實心或身家殷實並著該督撫妥爲察看分別委任

此外如有公正紳士亦著准其舉報聽候察委儻有浮華不實藉端生事之徒卽著從嚴甄汰毋令債事將此由六百里諭令知之

○癸亥諭內閣戶部奏遵旨酌定糧臺奏報支發各款限期章程一摺前因各路糧臺支發各款奏報稽延諭令戶部酌定限期妥議章程具奏茲據該部奏稱軍興以來款目愈積愈多若仍令各軍營每月一奏誠恐趕辦不及藉詞延宕著照所議於半年開單奏報一次統以六月二十日作爲奏報到部定限儻再遲延卽著戶部查明參奏經此次奏定章程各路糧臺及各省總局大員均當力杜冒濫積弊無論征防軍需支發各款趕緊清釐先行按照前定單款填註並覈明放款例案一併於本年十二月二十日以前限內奏報到部以憑查覈毋得仍蹈故轍因循玩誤○書元因事降調調富呢雅杭阿爲盛京戶部侍郎錫齡爲盛京兵

部侍郎善燾爲盛京工部侍郎以和潤爲盛京刑部侍郎

署刑部右侍郎

○乙丑壽臧和碩公主薨○丁卯向榮奏官軍自六月十七日擊敗賊匪後旬日之間屢次明攻暗襲賊均伏匿不戰二十七日探報江鎮又來賊萬餘由楂樹岡丁角寶堰分股竄至蔓延黃土橋河西連夜偷築賊壘臣帶領親軍小隊於二十八日親赴黃土橋河東督戰令虎嵩林沿河趕築營盤控扼堵剿斃賊不少該逆復潛搭浮橋渡過簡瀆河東黃莊橋偷築五壘因思賊勢既趨重黃莊橋其後路松柏村五里牌之賊必少密飭張國樑挑派隊伍分路力攻而以虎嵩林一軍牽制黃莊橋之賊二十九日張國樑親督大隊兵勇由五里牌上流搭渡進攻殲匪數十名立將礮臺踏毀乘勢躍過濠溝攻破賊壘斃賊無算餘逆飛奔後壘張國樑督隊催戰不料被賊擡槍子中傷左胯猶復奮勇前衝移時收隊臣

聞之倍深焦灼查賊鋒偏紮簡瀆河東已由南鈔近東面距大道
不過數里係丹陽入常後路該逆以全力來爭若不迅速埽除爲
患非淺迅將遊擊虎坤元由珥陵調回卽於是晚挑選兵勇派令
副將王浚等各率所部分作十隊檄令虎嵩林指揮督戰而以副
都統德崇額率領馬隊策應三十日丑刻出隊直趨簡瀆河東黃
莊橋會齊各軍分路攻勦斬馘無數攻進賊濠該逆拌死拒守大
礮擡槍子密如雨兵勇不避兇險爭先躍上壘牆砍斃柵門悍賊
大隊一齊擁入殲斃不計其數乘勝攻破二壘德崇額等馬隊左
右鈔兜殲斬無一脫者後面之賊越壘欲逃我軍馬隊一齊壓下
勢如破竹將賊匪橫衝肆擊大加誅戮餘逆紛紛撲河淹溺尤眾
遂將後面三壘並附村賊卡縱火焚燒河東黃莊橋一律埽平乘
勢攻撲河西該逆阻水密開槍礮與我軍死力抗拒張國樑添派

生力軍一支馳往策應一面修築三營安放大礮對河西賊壘轟擊斃匪不少該逆站腳不住於夜半焚壘自遁當將河西三壘一律平毀統計是日踏破賊壘五座轟破三座斃賊二千餘名伏思該逆此次蔓延黃莊橋河東勢甚猖獗今一戰而掃八壘實足以挫兇鋒惟是該逆偏犯丹陽於松柏村鳳凰岡等處築壘數十座我軍截剿經月雖屢有斬擒而賊黨踵至延陵寶堰一帶皆已有賊往來該處可以直走常州儻有疏虞則首尾不能兼顧惟有儘力攻剿或可杜賊兇鋒臣營精銳惟恃張國樑一軍今該總兵臣復受傷醫治尙需時日臣又骹疾大發寸步維艱昨以賊竄黃土橋力疾督陣復感暑熱氣喘加劇臣受國厚恩雖死不足以塞責第慮江南賊勢甚熾甯國建平溧水內犯處處可虞臣軍扼剿丹陽紮營二十餘里該逆因我兵截其東竄乃復糾集黨與四出窺

伺似此賊眾兵單大局萬分緊要可否籲懇 天恩添派得力大員前來協助不勝激切待命之至所有前蒙飭調各路官軍仍請旨嚴催迅速來營以資攻剿 上諭內閣向榮奏連日奪毀賊壘大獲勝仗一摺江鎮逆匪分股竄至五里牌黃莊橋等處偷築營壘經張國樑督兵由五里牌上流搭渡進攻擊散沿河匪黨直逼賊卡礮臺並督同將弁躍過濠溝將賊壘縱火焚毀餘匪飛奔逃逸其簡瀆河東黃莊橋一帶賊壘復經向榮調回虎坤元等分路攻剿將後面三壘縱火焚毀並焚附村賊卡數處河東黃莊橋一帶埽平其河西之賊於夜半焚壘自遁統計是日踏破賊壘五座斃賊二千餘名生擒七十一名剿辦尙爲得手著向榮督同張國樑等激勵諸軍截擊竄賊將延陵寶堰一帶賊匪悉數殲除節節進剿毋稍延緩○何桂清奏南陵大股賊匪於六月十三日復竄

涇縣之上下坊欲圖援應甯國周天受督軍馳勦該逆遁回南陵其甯國之賊乘我軍調赴涇縣南路空虛亦於十三日分股千餘人撲我營盤經都隆阿等奮力擊退提督鄧紹良自廣德馳回二十日督軍環攻該逆從西北兩門分股三四千人前來抗拒復從東路撲出二三千人併力接應我軍分投迎勦斃賊甚多該逆又撲我南路營盤復經都隆阿等四路兜勦賊鋒大挫潰奔西山一帶回巢是日之戰統計斃賊三四百人鄧紹良以南路兵力尙單復抽撥陳再受楊金榜帶勇二百名合力堵禦再圖圍攻其東夏餘匪於六月十六日糾黨直撲建平秦如虎骹傷未愈與署知縣張炳文扼守城池江長貴派遊擊蔣錫光等分路迎勦並親督都司劉仁福等鈔襲其後斃賊極多逆眾紛紛潰散我軍奮勇追勦沿河斬殺淹斃不計其數該逆於是夜全股竄往東壩

臣查甯國

軍情經鄧紹良統領諸軍節次圍攻賊勢已形窮蹙茲周天受一軍扼守南路可以杜南陵青石一帶賊援此後攻剿更當得手其建平一路自該逆竄陷東夏營盤疊次攻撲城池秦如虎江長貴先後督剿殲斃逆匪不下二千刻下全股退竄東壩剿辦甚爲出力惟定埠等處道路紛歧仍虞賊蹤竄突見在向榮飭令明安秦移師進紮定埠臣亦令秦如虎江長貴分兵進紮東夏定埠二處臬司慶廉並由廣德防所添撥兵勇畱於建城防守以爲東夏定埠策應至此次溧水賊匪大股竄犯建平意圖援應甯國攻襲浙江情形萬分喫緊諸將士合力同心屢戰皆捷得以保全大局所有尤爲出力各員相應開列仰懇恩施以昭激勸又奏查東壩地方當太平甯國高淳之衝實蘇浙兩省門戶其東壩後路有溧陽建平二縣又當東壩及溧水之衝亦爲蘇浙兩省門戶自賊踞溧

水以後可不必經由東壩而直犯溧陽建平故蘇省之防以溧陽爲扼要浙省之防以建平爲扼要向榮令明安泰管帶兵勇六千駐守溧陽原爲兼防溧水起見其時大營新退丹陽兵力不敷調撥僅令秦如虎管帶浙省兵勇千餘名防堵東壩而甯國攻勦正當喫緊亦僅能分兵千餘名駐紮東夏以防建平詎六月初二三日溧水之賊竄入建平定埠地方已在東壩之下十餘里建城並無防兵其地旣通廣德四安大路又有小路可繞出溧陽縣城直達宜興荆溪以犯蘇常湖三郡秦如虎因孤軍株守東壩無益於江浙兩省當卽商同仲孫懋拔營繞出賊前馳赴建平扼勦迨秦如虎行抵建平而縣城已有賊蹤當卽督率兵勇擊退迨後賊由東夏屢次撲犯秦如虎四戰皆捷克保危城並經鄧紹良派兵接應向榮復令江長貴前往助勦聲勢益壯賊聞風膽落大股退回

東壩十九二十等日又從南渡進犯溧陽爲明安泰擊退見在向
榮已飭明安泰由南渡進偪定埠一帶察看形勢擇要紮營一面
挑選兵勇交遊擊馬永清統帶約會秦如虎等相機會剿臣惟有
令秦如虎速飭將士步步爲營紮出東壩定埠會同明安泰肅清
東壩一面厚集兵力直偪溧水迅圖克復城池庶幾賊氛漸遠蘇
浙兩省門戶可鞏固矣 上諭軍機大臣等向榮奏連日獲勝攻
毀賊壘情形一摺已明降諭旨並令張國樑幫辦該大臣軍務矣
據該大臣陳奏患病情形朕心深爲懸念所請添派得力大員一
時實難其選該大臣久在戎行經歷各省所有提鎮以上大員必
有謀勇兼優素所深信之人著卽酌舉一二人速行密奏候朕簡
派前來以資幫辦張國樑身受槍傷猶復奮力前衝實屬勇往茲
已派令幫辦軍務自當益加奮勉以酬異數至前調廣東之兵昨

已復降諭旨飭催前調福建兵除分撥江西外應赴江南者尙有
三千四百名已諭何桂清飛檄提催其河南陝西官兵本日已諭
英桂催令傅振邦統帶迅速啟程又據和春等前奏於輯順所帶
馬隊之外續行抽調官兵一千餘名此二路官兵相距較近當可
剋期到營稍資分布建平賊匪據何桂清奏見已退回東壩浙省
自可無虞內犯惟東壩直達無錫距蘇州切近我軍皆在上游深
恐鞭長莫及著該大臣督飭明安泰等務將該處迅圖克復力扼
內犯要衝方能專意進攻不至顧此失彼將此由六百里加緊諭
令知之○諭向榮奏請飭催各路援兵一摺前據英桂奏稱遵撥
西安馬隊一千名令傅振邦統帶前往江南並於該鎮原帶官兵
內酌量抽撥一併解往見在向榮駐守丹陽雖屢獲勝仗而賊眾
兵單寇氛日偪張國樑復以接仗受傷情形萬分危急傅振邦統

帶西安馬隊係於何日啟程著英桂催令飛速前進該鎮原帶官兵內尙可抽撥若干著多撥精銳藉資得力爲要前撥福建官兵三千名因饒州失守已准廉兆綸將張從龍陳上國兩軍共二千一百名截留江西其餘一千四百名及續調福建兵二千名均應前赴江南是否已入浙境著何桂清飛檄迎提迅速馳赴向榮軍營聽候調遣毋任延緩何桂清本日所奏東壩地勢及布置情形均屬明晰周妥建平之賊既經擊退卽著該撫督飭秦如虎相機剿辦並知會向榮力扼東壩毋令該逆內竄將此由六百里加緊各諭令知之○命提督銜福建漳州鎮總兵官張國樑幫辦欽差大臣向榮軍務○戊辰 上臨故壽臧和碩公主第賜奠○諭內閣福濟奏請飭京員回籍辦理團練等語禮部候補主事黃先瑜前在本籍辦理民團著有成效著准其回籍接辦以資熟手嗣後

不得援以爲例○諭軍機大臣等和春等奏兵勇缺食請飭鄰封協濟一摺據稱安徽省北各屬被旱米價昂貴附廬數百里並無存米兵勇嗷嗷覓食必得鄰省迅籌接濟等語所奏自係實在情形著崇恩英桂於皖省接壤各屬或碾動倉穀或派員採買各籌辦小米一萬石小麥一萬石就近運至臨淮交廬鳳道張光第兌收轉運所需價值卽在該省應解廬州餉銀項下如數劃抵俾資兵食毋稍遲延將此由五百里各諭令知之○諭英桂奏潁州剿匪情形並親往陳州督防一摺該匪因正陽關河道被官兵設法闌截折回西竄是潁郡情形仍屬喫緊且該匪股數尙復不少東西奔突竄伏靡常英桂親往陳州原以保豫省藩籬但須酌量緩急隨時接應潁亳兵勇會合兜剿不可專駐本境以致聲勢未能聯絡潁州剿匪事宜卽畱袁甲三在彼調度著卽責成袁甲三嚴

督在事將弁迅將各股匪黨認真殄滅毋使稍畱餘孽亳州一帶
責成西凌阿實力搜捕以防該匪回竄傳振邦已赴江南軍營徐
州一路甚爲空虛史榮椿旣經署理該鎮事務著英桂酌度情形
如穎毫帶兵尙不乏人卽飭該總兵仍回署任以資防勦將此由
六百里諭令知之○己巳諭內閣御史毛昶熙奏請嚴捐復之例
並飭督撫保舉廉能各等語近年捐例疊經推廣卽如捐復一項
未免失諸過寬嗣後除因公獲咎人員仍照例准其捐復外其有
事涉私罪而覈其情節尙屬可原者始准加成捐復若廢弛不職
有玷官方酷虐貪污罔念民瘼者不得率行奏請以致漫無區別
其應如何分別條款明定章程以示限制之處著該部妥議具奏
至激清吏治必先拔擢賢才自用兵以來各直省牧令或堅守城
池認真團練或安輯難民嚴拏土匪一經奏請獎勵無不立沛恩

施嗣後仍著各直省大吏認真考察所屬各員如有治行廉能內而安民外而禦侮著有成效者隨時專摺保奏候朕錄用進賢之實在所不吝儒所舉非人或失諸冒濫亦必治以應得之咎務當循名責實勿徇虛聲以副朕孜孜求治之至意○雲貴總督恒春奏貴州下游各路剿匪獲勝並飭副將陳得功由文德關一帶直搗苗巢得旨陳得功一路尙屬得手著飭令可進則速進毋稍遲延苗教各匪不過蟻聚烏合居然僭偽號設僞官國家仁澤深厚小民雖愚何至喪良若是此必因平日貪墨官吏剝削使然至貴州省見在官場風氣若何並豫籌振作整頓之方著一一詳細具奏莫視爲緩圖○庚午諭內閣吏部奏京察一等人員呈明親老請明定限制一摺各衙門京察一等人員其有因親老情願畱養者例准於初次圈出後在部呈請扣除乃近來有俟記名後始行

移咨吏部者雖同係據實呈請究屬辦理兩歧嗣後京察一等人員如有親老情願畱京供職者著於初次引見奉旨圈出後卽由各該衙門咨報吏部扣除其初次未經記名再遇復帶人員亦著該衙門於保送時咨明吏部扣除均毋庸帶領引見如於奉旨記名外用之後始行呈明親老者概不准行以示限制而歸畫一○壬申諭內閣曾國藩文俊奏水師連獲勝仗收復南康府城一摺六月十一日下游有賊船上駛經惠潮嘉道彭玉麟派水師由東西兩路鈔擊斃賊甚多十八日五鼓出隊焚賊艦六隻我軍直赴南康城下沿岸堆集船料一概焚燒賊開東門逃竄該道督率水勇登岸進城安撫居民並派船巡哨防守此次水師奮力攻勦收復郡城勦辦尙爲得手著曾國藩等激勵軍士乘勝進攻殲除醜類毋稍遲延○曾國藩文俊奏饒郡西通都湖北接彭建實爲羣

賊淵藪四路可通時虞鏡伺臣等飭布政使耆齡督率水陸各軍擇要扼防相機攻擊並以阿達春一軍進紮童子渡而令畢金科移紮陶溪渡會合賴營併力守禦六月初一日探得都湖建德逆匪分三路內犯畢金科等亦分三路迎敵初二日進至陳家嶺畢金科奮勇衝殺殲斃長髮四百餘人追至卧虎山四面壁立遙見密林中尙有伏賊畢金科勒馬壓隊毋許再追該逆知我兵不入伏中遂由山背鈔至陶溪渡直襲賴勇營盤須臾火起被陷賴營各軍退屯四十里街畢金科以陶溪營壘被陷恐童子渡亦難孤立帶勇退紮北門外初四日該逆分竄景德知其爲聲東擊西之詭謀議定賴營諸軍力扼東路阿達春畢金科防禦西路水師分布沿河一帶初五日賊眾分五股來撲郡城畢金科等分途迎敵鏖戰二時賊黨敗走追不數里忽分股鈔出隊尾兩營腹背受敵

顧勇之在茅園者亦已敗退賊眾由北門竄入直出東門各營紛紛潰散水師賀虎臣康國器兩軍見事勢危急督帶水勇登岸畢金科率親兵百餘回擊由高門進至東門水勇登城短兵相接殲賊三百餘名該逆狂奔出城我師雖於收隊時轉敗爲勝然以傷亡過多勞乏過甚未敢久駐城內耆齡督率水師泊於城河對岸陸營亦分紮角山圩等處旋與賀虎臣退至距饒三十里之表恩地方該逆於城外紮營四座堅壘深溝極爲周密二十一日耆齡等定大舉進攻之議二十二日東路水師先抵黃龍廟哨官場占鰲首先登岸畢金科等率兵勇繼進奮力衝殺火箭火彈四面拋放賊營火起紛紛潰敗遂合攻東門該處悍賊併力死拒適協和營繼進水師亦舍舟登岸環攻數重始衝入賊營乘勢進城追至大街城中伏賊突起三路鈔來畢金科乘勝怒戰連刺騎馬賊十

一名該逆棄械逃奔計殺死及羈斃約五六百人其自西路進者康國器先帶礮船於高門上下開礮故作攻撲之勢城西之賊分撤往救耑督令守備羅玉祥等爲三隊迅速登岸賊之撤救高門者回顧不及濟勝軍水師及陸勇乘機分道上城勦殺守城之賊旋分撲高門靈芝門賊營縱火焚燒賊膽驚落遂大奔潰分投追勦殺賊千餘生擒八十五名立將饒州府城克復伏查饒州一郡捍禦都湖皖南之賊東蔽廣信南衛省垣實爲江省要區此次失陷半月幸我軍一鼓克捷保全東北藩籬然近而都湖遠而徽池匪黨環窺仍須厚集兵力方足以資防禦 上諭曾國藩文俊奏饒州失守旋經克復通計殺賊千餘名生擒八十餘名奪獲軍械無算當將府城克復辦理尙爲得手所有出力將弁著准其擇尤保奏以示鼓勵○諭軍機大臣等德興阿等奏據張國樑稟報

向榮患病於本月初九日在營病故覽奏深堪憫惜已諭知怡良暫署欽差大臣關防向榮應得卹典俟怡良報奏到日再降諭旨至所奏近日樸樹灣三汊河攻剿情形斃賊止數十名仍未得手此時丹陽大營自向榮故後甚恐逆匪乘隙窺伺四出紛竄雖經先派張國樑幫辦軍務當必與福興隨同怡良實力防剿德興阿等亦應加意籌防與江南聯絡聲勢使賊匪無間可乘並著督飭將士將江浦瓜州賊眾趕緊殲除毋再延誤將此由六百里加緊諭令知之○諭本日據德興阿等奏接張國樑密稟向榮於七月初九日在營病故等語覽奏實深痛惜此時丹陽大營統率無人所有欽差大臣關防著怡良暫行署理俟簡派有人再行交卸鎮江逆匪雖經張國樑督兵攻毀賊壘疊獲勝仗而逆勢狃一聞向榮病故必將併力攻撲丹陽大營設有疏虞大局何堪設想怡

良身任總督於該省防剿事宜本屬責無旁貸見署欽差大臣軍營一切布置必應悉心籌畫力遏賊衝張國樑昨已降旨令其幫辦軍務所有丹陽戰守事宜卽責成該員督帶弁兵相機剿辦毋稍鬆懈朕聞福興近日與張國樑不能和衷雖無嫌隙而意見參差將士無所適從怡良曾函知許乃釗令其前往開導軍營將士不和關係最重曾諭令向榮將福興與張國樑不能和衷之處據實速奏並因福興尙能督帶馬隊若移往江北較爲合宜或令在江南自統一軍分營防剿卽徽甯等處亦可酌量撥往以免互相掣肘見在向榮病故未及覆奏著怡良密爲察看如果福興與張國樑不能和衷辦事或將福興調赴江北或令其自領一軍奏明請旨並將該員等不能和衷之處據實陳奏浙江護運火輪船已駛入大江滬商護運之船是否已入江合剿上海添購輪船見已

如何籌辦所有水陸進剿機宜均著迅速妥籌隨時奏報以慰廑念將此由六百里加緊諭令知之○諭前因向榮軍營兵單諱葉名琛撥兵四千名酌派崑壽通安等統帶由海道前往江南嗣因葉名琛奏崑壽已由和平前赴贛州復諭該督以江南情形較贛州尤爲喫緊如崑壽尚未出粵境仍令帶兵赴江南軍營想葉名琛等接奉此旨自當迅速派撥惟此時丹陽等處賊眾兵單並乏得力帶兵大員見在廣東赴援江西之兵已有壽山謝焜孫福同等管帶著卽飭令崑壽徑往江南丹陽軍營藉資攻剿該提督克復和平後是否已由江南折回改由海道前進或已出粵境行抵江南著葉名琛柏貴曾國藩文俊確探該提督見在何處傳旨催令迅赴丹陽毋稍延誤至江西省各路援軍漸次雲集南康饒州兩府城已報收復建昌撫州亦獲勝仗大局當有轉機且逆賊營

聚江南則江西境內情形較鬆曾國藩等務宜乘此機會激勵將士將臨江瑞州等府次第克復此次畢金科攻克饒州尙能奮勇著令隨勦隨進毋得株守一隅專待外省援兵致稽時日將此由六百里加緊各諭令知之○曾國藩文俊奏福建援江兵勇三千一百人見到建昌府者已有二千六百人屢接浙閩總督臣王懿德來咨先派護副將陳上國帶一千五百人馳赴金陵交向榮調遣其餘兵勇仍交副將張從龍畱於江西攻勦建昌臣因饒州失陷恐賊蹤竄擾廣信擬俟陳上國閩兵過郡之便截畱防守廣信今饒州業已克復此項閩兵卽無庸畱防廣信應令迅赴金陵以資援剿至湖北援師由曾承堯曾國華等統帶來江已於六月十八日克復新昌縣二十四日克復上高縣七月初旬可至瑞州從此兩湖聲息可通大局當有轉機廣東援師據報潮州鎮總兵壽

山於五月十九日已至贛州府城二十二日大獲勝仗防守尙嚴
當可保全要郡奏入報聞○癸酉諭內閣欽差大臣前任湖北提
督向榮由行伍疊次出師滑縣喀什噶爾等處以備升序升專閫
蒙 皇考宣宗成皇帝超擢提督久歷戎行戰功屢著前因粵匪
肆擾統兵督勦力保桂林長沙等城經朕授爲欽差大臣由湖南
追賊直抵金陵雖未能克復堅城而忠勇樸誠士卒用命數年來
保障蘇浙並分援皖南江北等處均能盡心竭力懋著勤勞本年
五月因賊眾兵單扼守丹陽復力疾督陣誓殄賊氛方冀其會集
援兵軍威重振遽聞溘逝痛惜實深披閱遺章無一語計及家事
尤見忠忱義憤公爾忘私向榮著加恩開復提督賞還花翎卽照
提督軍營病故例賜卹並著賞給一等輕車都尉世職任內一切
處分悉予開復應得卹典該衙門察例具奏伊孫向恩等三人著

俟服闋後由吏部帶領引見其靈柩回籍時著沿途地方官妥爲照料用示朕褒嘉忠藎至意尋予祭葬諡忠武○略秉章奏官軍自連破袁州城外賊營後賊急邀臨江安福萬載股匪助逆固守五月十五日道員劉長佑分三路進剿賊從南門盡擁而出教諭劉坤一等分投截擊斃賊二百餘名餘賊收隊入城十八日賊由洪塘向株樹潭進發圍撲瀏勇營盤軍功崔大光等帶勇馳擊衝殺十餘里斃賊四百餘名是日劉長佑派隊分攻袁州府城誘賊出戰亦斃賊百餘名二十五日賊分三路來撲營壘劉長佑開壁縱擊賊大奔潰追至城根始還是日斃賊三四百名二十六日至六月十五日疊次攻城擒斬賊匪數百名此袁州一路援軍攻城獲勝之情形也同知蕭啟江等於克復萬載縣城後瑞州新昌上高臨江之賊互相糾約分屯於縣東南北三面意圖復陷萬載五

月初八日賊匪直薄都司田興恕等營壘經我軍擊敗須臾賊隊大至官軍屹立不動追賊近前始開放槍礮擊斃甚多賊乃潰走蕭啟江等復分路追殺大獲全捷其計斃賊一千數百名十九日賊復糾集各處股匪齊撲官軍營壘蕭啟江等督勇衝擊逾時賊始敗潰我軍追抵江南八角亭燒其營壘四座各營分路縱擊其斃賊千餘名六月初三日探報僞國宗楊義青自金陵擁賊一萬並合各股敗匪前來前隊已至距萬載縣城三十里之帶塘地方將撲官軍營壘初五日蕭啟江等派令湘勇分路進擊賊從田隴蠡擁而至守備楊恆升等橫截而出縱橫衝突賊遂四散狂奔追逐二十餘里直抵柏木地方收隊是戰其斃賊二百餘名此萬載一路剿賊獲勝之情形也是日鄂省所派援江之同知銜曾國華知縣劉騰鴻參將普承堯同知吳坤修等亦經臣札飭由瀏馳抵

萬載縣城軍威更壯蕭啟江等遵檄助攻袁州府城二十至二十七日劉長佑與蕭啟江疊次環攻賊負嵎不出曾國華等於十七日進攻新昌之方塘斃賊二百餘名十八日乘勝進攻新昌縣城賊之大隊已遁一鼓拔之二十五日直趨上高劉騰鴻普承堯等分兩路進守城之賊洞開城門劉騰鴻等先分隊截其出路直入城中立斃悍賊二名賊遽駭走官軍分隊追之共斃賊百餘名遂復上高縣城聞各路敗匪萬餘均聚瑞州府城官軍已於二十九日拔營前進臣擬飭諸路一面相機搜剿將旁近股匪次第殲除賊如出城援應即可乘機痛剿儻仍負固一城則枝葉彫枯本根亦當自萎似亦反客為主致人而不致於人之一說也至袁州萬載兩路援軍已增至八千有餘閱時半載前後其獲三十餘捷在事各文武實屬不避艱險著有微勞懇恩獎敘以勵軍心其陣亡

之外委劉祖貴因傷殞命之外委杜家星並懇飭部從優議卹

上諭此次援江各軍疊獲勝仗連克新昌上高縣城勦辦尙屬得手著卽乘勝進攻盡殄醜類陣亡外委劉祖貴因傷殞命之外委杜家星交部從優議卹出力員弁兵勇准其查明保奏候朕施恩

○諭軍機大臣等赫特賀滿慶奏廓夷議立合同見據前後藏僧俗人眾懇准照議和息並鈔呈檄諭稟底各件廓夷與唐古忒尋釁經我兵勦辦屢次獲勝遣人乞和自應檄諭揀派頭目至邊界同委員妥議章程俾得永遠遵行乃藏格巴都爾竟敢擬含混合同迫令宜瑪頓柱等在彼了結前藏呼徵阿齊圖呼圖克圖後藏色本諾們罕並僧俗番目百姓等公同呈懇准照所議合同完結自應俯順輿情從權辦理以期息事安人赫特賀繕給檄諭以此

次從權允准係該大臣委曲成全不敢據情陳奏所辦尙爲得體

至息事之後所調各兵即可裁撤一切善後事宜著該大臣等詳細妥辦將此諭令知之○諭瑞麟慶祺奏遵查黃河各渡情形並山路湖路形勢酌籌防堵一摺據稱自江南至山東山湖兩路並無險隘可守黃河自蘭陽口門以下至未入大清河以上漫流處所若扼守兩岸無虞偷涉惟張秋鎮東北官設渡口以齊河及東阿之大河口平陰之滑口三處爲要津請於各渡口對岸建築礮臺數座安設槍礮無事則令地方官嚴密盤查有警則收提沿河船隻設官駐紮再令沿河團練居民分段防守以濟兵力等語所奏形勢尙爲詳晰黃河天險湍急湍洄竄匪不能飛渡而港汊多歧防範宜密瑞麟等所奏係蘭陽漫口以下情形其地皆在山東著崇恩按照所議酌量設防至蘭陽口門以上河南地界亦當一律防範英桂見在出省勦辦捻匪勢難兼顧著王履謙李鈞各就

地勢與該撫籌商辦理前據軍機大臣文慶等奏請實行團練當降旨交各督撫認真督辦河南山東二省見擬如何辦法若能擇要先行團練藉民力以防守既可以省兵力而各州縣村莊星羅棋布較之撥兵防守更爲周密朕聞山東所屬曹單兩處民國最爲得力著崇恩加意激勵聯絡紳民俾各鼓舞奮興同心敵愾河南民國亦不乏堪資禦侮之處並著王履謙等實心經理均著妥議章程先行具奏不得視爲具文將此各諭令知之○福興等奏遞欽差大臣向榮遺摺得旨據德興阿奏該大臣因病出缺實深痛惜茲閱向榮遺摺並無一語計及家事尤堪墜淚○命兩江總督怡良暫署欽差大臣督辦江南軍務○以湖南援軍克復江西新昌上高二縣城賞都司田興恕巴圖魯名號餘升敘有差○予廣西殉難參將成保等祭葬世職○乙亥諭內閣何桂清奏東夏

兵勇退縮請將稟報兩歧之鎮將分別嚴議議處一摺署安徽皖南鎮總兵江長貴前任雲南楚雄協副將秦如虎經該撫飭令進紮東夏定埠二處防堵江長貴所統兵勇因東夏營盤未及紮定被賊攻撲遽行退避輒稱秦如虎無兵援應與秦如虎續報撥兵應援情節不符顯係各存意見江長貴著交部嚴加議處並著何桂清飭令前往徽州仍交張芾差委秦如虎接應遲延亦屬咎有應得著交部議處以示懲儆○諭軍機大臣等何桂清奏亢旱災象已成見在查辦等語據稱浙省見在節過立秋甘霖未沛禾苗黃萎災象已成且河流乾涸蘇杭舟楫不通各屬並有鬧災滋事之案覽奏廬念實深該省旱象已成禾苗未能插蒔應行分別蠲緩事宜自應酌籌辦理惟刁民藉災紛紛滋事其風亦斷不可長所有嘉興各屬及龍游桐廬等縣鬧災滋事之案業據該撫飭委

楊裕深繆梓等分別查辦著將爲首滋事之人嚴拏懲治以儆刁風其被災較重之區並著委員會同地方官迅速詣勘具奏江蘇界連浙省前據趙德轍於六月內陳奏望雨甚殷見在被旱情形當與浙江無異著怡良趙德轍派委委員分詣各屬查勘據實具奏以副朕軫念災黎至意將此由五百里各諭令知之○諭逆賊由東夏定埠屢撲建平希圖內犯前已疊降諭旨責成明安泰迅將東壩克復以固要衝本日據何桂清奏江長貴扼守東夏兵勇退縮已飭令折回徽州並飛催明安泰進紮定埠等語東夏定埠已在東壩之下爲內竄必由之路見在僅有秦如虎一軍扼守建平而逆賊來路未絕豈能杜其窺伺怡良見旣暫署欽差大臣全軍皆歸調度未可專諉之浙江致滋貽誤明安泰一軍不下五六千人何以不能克復東壩亦不聞進紮要隘但令株守一隅著怡

良等卽飭該總兵迅速督兵前進扼紮定埠卽將占踞東壩之賊奮力擊退以保內竄之路儻有託故耽延卽著怡良據實參奏以肅戎行再前此調赴江南之福建護副將陳上國所帶閩兵一千五百名因廣信喫緊暫畱該處昨據曾國藩等奏饒郡克復已將此項官兵飭赴江南軍營著怡良飛速催提以資攻剿將此由六百里諭令知之○丙子諭內閣易棠奏剿捕撒拉回匪肅清地方一摺甘肅循化廳屬撒拉回子聚眾滋事盤踞河北巴燕戎格廳屬撒拉回匪亦聞風糾眾肆掠經該督派兵馳往剿捕各匪畏懼解散其抗拒不服之阿藏吾具列朵朵者黑曲等三莊回匪經官兵分路進攻擊斃首匪五十八等十一名夥賊五十餘名逃匿麻古塘之首匪沙乙的等二十七名均被官兵殲戮無遺其悔罪投誠各回莊細獻各犯亦訊明就地正法見在地方肅清辦理尙屬

迅速所有在事出力員弁兵勇准該督擇尤保奏毋許冒濫○諭
軍機大臣等和春福濟奏請將派赴江南之總兵暫畱剿辦捻匪
等語徐州鎮總兵傅振邦管帶西安馬隊據英桂奏報已於六月
二十七日由潁州啟程據和春等本日奏報亦稱該總兵已行至
徐州此時若再令折回皖境未免徒勞往返見在向榮因病出缺
已命怡良暫署欽差大臣丹陽軍營正在乏員調遣且徐州鎮總
兵已派有史榮椿署理昨復諭知英桂如潁毫帶兵有人卽飭史
榮椿前往署任果如該提督等所奏徐州或有警信儘可責成史
榮椿實力防剿傅振邦著仍遵前旨飭令帶兵卽赴丹陽毋庸暫
畱皖境如已行抵徐州亦不得率聽該道稟畱致滋延誤至另摺
奏報潁州獲勝及捻匪竄撲三河尖正陽關等處情形前已據英
桂馳奏嗣據英桂續奏該匪由正陽回竄潁郡股數尙多嚴之和

春等見奏大致均屬相同見在英桂已赴陳州袁甲三在潁州督
勦西凌阿在亳州防其回竄雒河皖豫兩軍聲勢尙爲聯絡著和
春等嚴飭珠克登郝光甲塔思哈等會合豫省官兵務將正陽潁
上霍邱各股匪悉數兜勦淨盡免致與粵逆勾結蔓延其淮河搶
船之匪前據英桂奏經多慧塔思哈等跨河爲軍疊次勦敗見多
嘯聚沿河南岸卽著知會袁甲三督同該侍衛等就近堵截毋任
順流東下將此由六百里諭令知之○予安徽陣亡巡檢林觀宸
等祭葬世職○丁丑諭內閣前據軍機大臣文慶等奏請飭各直
省實行團練並侍郎沈兆霖奏請行民團各一摺當經諭知直省
督撫各就地方情形酌量辦理並先擬章程具奏茲據崇恩奏稱
山東本係通省辦團自北路肅清後陸續遣散惟曹州濟甯等處
尙未撤防該處團練頗能得力擬請仍就見未撤防各屬卽責成

賢能州縣實力辦理司道府州所轄地方遼闊未能與民相接無庸加團練虛銜等語所奏係就該省情形而論該撫果能慎選賢員責以治效則眾志成城民心堅固原可准其擇要舉行其餘暫行從緩惟沿河緊要地方尙復不少昨經該撫酌量設防之處仍著速行籌辦此外各州縣編查保甲亦當實力奉行以戢奸宄而期周密至各直省情形不同用兵省分更非山東可比該督撫等當各按地方情形妥爲籌畫著將擬辦章程迅速具奏毋得視爲具文致涉延緩○戊寅諭內閣繙譯孝經係雍正年間編輯爲八旗各項考試命題之本向無清文漢字合寫成書且其時滿洲新語未備書中音義皆係舊語見在各省駐防鄉試童試舉行繙譯已歷有年在京各項考試尤爲八旗士子進身之階誠恐其循誦習傳不免參差簡略朕因詳加校閱遵照乾隆年間 欽定繙譯

五經新語悉加釐定著武英殿刊刻清漢字合璧成書頒行中外
俾各士子講習有資用昭法守○胡林翼奏黃州城內逆賊屢於
雙鳳山修築礮壘官軍於六月十二日進攻斃賊五百餘名立將
礮壘平毀其攻樊口之軍三千人於十三日渡江正在合力以取
黃州而各路報稱逆賊石達開自金陵糾眾上犯湖口逆匪亦併
力上竄詐稱五萬已到者實不過三萬人按得石逆僞文調江西
臨江府城之賊從義甯通城來擾上游又稱見於安慶彭澤等處
造船運礮以資水賊之力蓋賊之力爭江漢其蓄謀固已狡矣臣
思三千餘人觸暑遠征倖而獲勝此次賊數較多必非三千人所
能獨禦且臣之後路歧途甚多其由義甯至蒲城者一路由興國
至崇通者一路由大冶出金牛者一路均可擾臣營之上由武昌
縣出華容葛店者一路其擾土橋豹子解青山者又分爲數路均

可擾省城之下禦於此必遺於彼遂於二十七日將行軍撤回大營而援賊已分一萬餘人先走金牛上竄山坡七月初四日派同知蔣益澧等分率各營出師於紙坊以禦之賊之行抵金牛者覘知有備遂折而併力於武昌縣之葛店以趨洪山之後初十日蔣益澧等仍轉紮魯家巷實爲洪山後路之總要十一日該逆分十三股排列而至每股一二千人旗幟林立我軍分路進擊殺賊四百餘名十二日水師遊擊鮑超等由沙口下駛乘勢將樊口之浮橋燒斷又登岸毀其陸路之壘都司喻吉三於黃州城下燒賊船數隻旋卽回泊沙口魯家巷兵力尙單臣又添副左寶營七百人以益之十三至十五日賊兩次撲營官軍先後斃賊七百餘名查石逆自上年由鄂入江西攻陷吉安以後潛由江西九江安徽祁門至金陵方鵬張於下游復回竄於武漢逆燄頗熾必應慎以持

之臣之中路李續賓之東路合計勇丁一萬餘人刻下抽調四千七百人於魯家巷迎剿臣營止三千人洪山亦不過四千餘人城中困獸固不可稍有疏縱而外援杳至亦不能不分投迎剿至臣營後面可通金口紙坊者約有三路臣先期挖掘長壕濠內築壘每壘可容二百人仿古人礮堡之式以資防禦諒不至四路侵軼致爲驚擾而臣亦得以專剿城中之賊並分兵以剿援匪此先期布置之情形也上諭軍機大臣等武漢賊勢久蹙因官軍不能實力進攻致下游賊黨得以徐圖搗應武昌南路本無布置黃州之兵復撤則東路賊匪亦將源源而至惟城中之賊既已窮蹙自應迅速進攻剋日收復則外來賊眾絕望自易剿滅著官文胡林翼悉心籌畫併力攻剿毋得再涉延玩前因江北軍營帶兵乏人酌調孔廣順前赴揚州茲據奏稱該員見紮沙口其地爲外江內

湖鎖鑰既關緊要著准其暫緩前往儻接替有人仍令馳赴揚州聽候德興阿調遣至湖北援賊號稱數萬若非裹脅無業游民安得如此眾多朕聞皖楚曾經被擾之區牧令或潛匿鄉村爲苟安之計巨室則遷徙一空城鄉小民貿易傭趁者無計謀生遂致被賊裹脅是以賊黨愈聚愈多兵勇不敷抵禦實爲今日受病之源若不急圖變計正本清源將誅不勝誅伊於胡底前據文慶等奏請實行團練業經寄諭各督撫各按地方情形酌辦官文胡林翼職任封圻責無旁貸著於督師進勦外畱心選擇賢能大員分投督辦如黃州崇通等處皆爲賊匪竄擾出沒無常苟能慎選循良星羅碁布招集流亡實力團練在小民有所依歸不至流而爲匪則賊援日少賊勢日孤未始非軍務之轉圜也該督撫等毋得視爲迂緩致誤軍機將此由六百里加緊諭令知之○諭昨因向榮

在丹陽軍營病故已命怡良暫署欽差大臣接辦軍務因念江南軍營見在帶兵大員乏人和春曾在向榮軍營隨同打仗於江南情形較爲熟悉著卽馳赴丹陽軍營協力相機堵剿再行聽候諭旨鄭魁士見在懷遠所有和春統轄之安徽軍務卽著鄭魁士接辦和春著俟鄭魁士到營交卸後卽行迅速啟程毋稍遲緩將此由六百里諭知和春福濟並諭鄭魁士知之○己卯諭內閣前因三省會剿捻匪特派河南巡撫英桂督辦所有江蘇安徽派往帶兵各員自應悉聽調度茲因總兵郝光甲等遷延不進業已嚴加懲創以肅軍令而一事權候補三品京堂袁甲三隨同英桂剿捕捻匪見已追至潁州等處距英桂大營較遠各路帶兵將弁卽著袁甲三就近調撥儻有藉詞規避不遵調度者著會同英桂據實參奏其三省會剿事宜仍著英桂督辦該撫卽飭帶兵各員迅將

擒匪分投勦捕毋得稍分畛域以致此拏彼竄再令蔓延○福興
奏七月初五日逆匪三四千人突撲五里牌地方經總兵張國樑
等分路攻擊殲斃逆眾甚多餘匪向西南之十里牌賓村回奔追
殺無數初六日又出賊二三千人來犯城西營盤我軍先於黃土
橋設伏該逆甫向前進捷勇連放大礮斃賊一百餘名該逆且戰
且退突有十里牌賓村各壘賊匪出巢接應我軍爭先衝殺又斃
匪數百名其時協領輯順等帶領馬隊包鈔賊後伏兵亦四起橫
截該逆潰竄回巢一路掩殺甚眾兩日之戰共計斃匪一千餘名
該逆受此懲創兇醜更挫連日堅伏不出自初九日向榮出缺後
臣密商張國樑嚴飭各營倍加防範一面將東西兩路營盤向前
移紮緊逼賊壘晝夜用大礮轟擊逆勢不支卽於十三日分股宵
遁一股竄往寶堰一股牽掣我軍當經張國樑派馬步各隊乘夜

攻擊擒斬數百名該逆敗回白兔一帶我軍一路追剿斃匪甚多
卽將河東河西賊壘十一座概行踏毀臣等以寶堰一鎮關係內
竄金壇溧陽之路最爲緊要當派遊擊虎坤元帶兵二千餘名間
道馳赴金壇助剿旋探該逆復分兩股一竄金壇一奔溧陽臣等
趕卽添派兵勇二千六百五十餘名飭令參將魯占鼐等管帶前
往統由總兵虎嵩林會商駐守溧陽之總兵明安泰相機進剿十
五日又添派參將李定太等挑選勁旅二千名帶赴金壇合之遊
擊李鴻勳所帶一千餘名計數將及一萬兵力不爲單弱攻剿尙
易得手惟查該縣接壤溧陽有關蘇浙門戶而逼近常州各屬僻
徑甚多亟宜嚴扼內犯杜其旁走荆宜下竄常郡之路臣等一面
嚴飭援剿各員乘賊布置未定迅解金壇之圍總期以剿爲堵勿
令該逆蔓延分竄一面由大營再行撥兵一千名派員速赴常州

聽候督臣怡良調遣此時匪蹤雖去丹陽稍遠而同竄亦屬意中之事見探得白兔以上直達句容逆勢聯絡往來如故卽溧水東壩一路並須妥籌兼顧原不得以金壇一隅之地牽掣我軍全勢如果金壇城圍立解卽可移軍迎賊所向爲步步前進之計若勦辦稍稽時日或該逆別有動靜則臣與張國樑二人趕緊酌量一人前往督勦免致顧此失彼再張國樑槍傷尙未合口該總兵心急如焚不勝焦灼之至合併陳明 上諭軍機大臣等逆黨圍攻金壇奔竄溧陽內犯愈急該二縣均爲蘇浙門戶儻復旁趨荆宜下窺常郡大局更憂掣動該將軍奏赴援金壇之兵計數將及一萬足敷攻勦金壇解圍後卽著步步追勦未可以一隅之地牽掣全軍如果情形緊急卽著福興張國樑酌分一人馳往督辦怡良暫署欽差大臣此時自己前往丹陽就近調度賊匪聲東擊西計

甚狡譎丹陽既有重兵扼守更慮其旁竄他處不可不加意嚴防東壩直通無錫見在尙爲賊踞著怡良等飛催明安泰進紮定埠速攻東壩絕其內犯之路張國樑前受槍傷瘡口未合著發去如意拔毒散一料交該總兵祇領趕緊醫治就痊以慰朕懷再前據文慶等奏請實行團練一摺當經寄諭各督撫各就地方情形認真辦理江蘇省淮徐一帶恐怡良等鞭長莫及著卽知照庚長邵燦就近酌辦將此由六百里加緊諭令知之○諭英桂奏擒匪分竄並江皖各軍藉詞觀望據實參奏一摺見在英桂駐紮陳州距潁州較遠據奏袁甲三非假以事權恐呼應不靈自係實在情形本日已降旨令袁甲三就近調度如有藉詞規避之員會同英桂參奏以專責成惟三省會剿擒匪英桂係總統大員責無旁貸所有各路兵勇仍當統歸該撫調遣不得以動多掣肘意存諉卸前

有旨令史榮椿署理徐州鎮總兵並令卽往徐州防堵茲據英桂奏請畱該鎮在皖剿匪如果徐州見無賊蹤史榮椿原可緩赴署任儻該匪實有窺伺徐州之信則彼處係北竄要路豈可無兵堵截應否仍令史榮椿回至徐州之處仍著英桂確探緩急情形斟酌辦理毋得顧此失彼致貽後悔該撫駐紮陳州兼顧豫境前奏布置各情尙屬周妥第捻蹤紛竄無常務當嚴飭帶兵將弁實力兜剿並隨時接應潁亳等處聯絡聲勢不得專顧豫境稍有畛域將此由六百里諭令知之○以剿辦捻匪藉詞退避革總兵官郝光甲副將塔思哈營總明山佐領松志職仍畱營效力○予安徽陣亡遊擊朱淮源等祭葬世職○庚辰裁併 和妃園寢員役增設 慕東陵禮部員外郎二工部員外郎一讀祝官二贊禮郎四內務府郎中員外郎主事內管領尙茶正尙膳正各一筆帖式二

防禦十六驍騎校二領催四披甲人七十六○癸未諭軍機大臣等昨因東壩尙爲賊踞疊諭怡良等飭令明安泰進紮定埠速攻東壩以絕內犯之路本日據宗人府府丞宋晉奏明安泰見駐溧陽所帶之兵分屯城廂寺院毫無紀律並有縱兵搶掠延燒房屋情事請飭張國樑馳往勦辦等語東壩爲蘇浙咽喉明安泰兵力已不爲薄何以並未見進攻東壩轉在溧陽縱兵焚掠此等漫無紀律之軍安能望其克敵著怡良等密速查明如果實有其事卽將明安泰並所帶之兵全行撤回嚴參懲辦另派得力鎮將酌帶勁旅馳往東壩實力堵剿以防內竄張國樑見在傷未平復且丹陽金壇均形喫緊未便令其專剿一處所有應行調撥兵將著怡良等妥速籌派另片奏皖南道鄧瀛南國府知府顏培文守禦無方請旨另簡等語該二員本係應行革職之員因一時接替乏員

是以暫令畱任該府丞所保浙江候補道繆梓一員是否能勝皖南道之任卽著怡良會同何桂清查看具奏此外如有賢員堪勝皖道並甯國府要缺者亦著據實保奏候旨簡放將此由六百里各諭令知之○是月緩徵廣東連州等十二州縣山東高唐等五州縣及德州衛被擾被災地方額賦

東華續錄

咸豐六十三

臣王先謙敬編

臣陶澐宣恭校

八月乙酉諭軍機大臣等何桂清奏浙省支應浩繁來源日少協濟江蘇之餉請飭蘇省籌給一摺據稱浙江省見籌防勦徽甯玉山等處每月需餉較上年增至十二三萬餘兩加以引鹽滯銷捐款均無起色蘇省協濟徽甯之餉二十萬僅收十二萬兩若再每月協貼江南大營必致各路餉缺所奏自係實在情形所有浙省每月協濟江蘇餉銀六萬兩准其暫行停撥卽著怡良趙德轍在蘇省藩庫各款內自行籌給毋稍遲誤一俟皖南廣德等處防務稍緩何桂清仍當每月照舊協濟江蘇軍餉毋得稍存畛域將此由五百里各諭令知之○諭官文奏漢陽近日攻勦情形並分

兵赴武昌助剿一摺此次官文督飭李孟羣王國才等進攻漢陽雖有斬擒輒因該匪濠壘深厚伏匿不出以致我兵未能得手逆賊被圍日久其勢已困必須乘勢進攻力圖克復雖賊壘堅厚槍礮甚多亦當設法攻剿出奇制勝斷不可藉詞延宕致誤事機官文總統諸軍見當攻剿喫緊之際必當親督兵勇奮力圍攻若紮營處所距賊太遠恐呼應不靈難期得力武漢逆匪倚爲犄角若能克復一城則賊勢已孤併攻較易著官文胡林翼各飭將弁水陸並進毋得日事遷延致干重咎至賊援屬至號稱數萬其中多裹脅避民未必盡如粵匪之兇悍惟旣欲攻城又禦援賊不免受其牽掣而見在附近各省實無可添調之兵湖南省屬齒相依道路較近未知有無可調之兵勇著駱秉章酌量情形如能抽撥兵勇速派得力之員統帶前赴湖北會剿得此一軍以禦賊援則官

文等可專力攻勦克復城池不至兩面受敵爲賊牽掣矣將此由
六百里加緊各諭令知之○丙戌諭軍機大臣等舒興阿奏西路
勦匪獲勝及勦辦海口回匪情形各一摺雲南東西兩路回匪蜂
起據所奏姚州等處連日斃匪雖有千餘而損兵折將亦復不少
東路楊林等處及近省之海口亦有員弁陣亡舒興阿於籌辦機
宜尙未得手恒春見在貴州督勦如都勻鎮遠等處辦理既有就
緒卽著折回雲南與舒興阿會商妥爲布置如一時未能離黔應
如何撥兵援應或另有籌畫調度之處亦著知照舒興阿文祥妥
爲籌辦恒春兼轄滇黔務當酌度兩省情形先其所急舒興阿因
兵力不足見擬勦撫兼施然畏威之後方能懷德亦不可示之以
弱致令匪勢愈張梗化者宜實力勦辦投誠者當加意撫綏方爲
情法兩平寬嚴得當將此由五百里各諭令知之○諭扎拉芬泰

奏伊犁地方出產茶斤商民人等採取售賣擬酌徵商稅一摺自係爲裨補經費起見惟此種茶斤恐不自今日始行出產向來何以並未議及收稅其每年計產茶斤若干約收稅課若干該將軍尙未能知其數見擬試行收稅務須詳加體察如果與情稱便並無窒礙再行妥議章程具奏伊犁地處邊陲民間貿易多與外夷交涉儻行之或有流弊不可規目前之小利而貽患於後日也將此諭令知之○予雲南陣亡知府淡樹琪等祭葬世職○戊子祭

大社 大稷○諭內閣前因黃宗漢久未奏事諭令明白回奏並諭樂斌查明具奏茲據該將軍奏稱該督素有疲鬱之疾今春感受時氣以致舊疾復發見在趕辦積壓案件精力尙能勉支等語黃宗漢平日辦事尙屬認真乃半年以來於地方應奏事宜並關涉軍務要件延擱不奏迫降旨令其明白回奏又不據實陳明

雖經樂斌查明該督素有痲疾見在趕辦案件尙非有心積壓而封疆重任豈容以病軀久戀致令公務廢弛黃宗漢著交部議處卽行來京另候簡用○以吳振械爲四川總督譚廷襄爲陝西巡撫轉齊承彥爲刑部左侍郎以李清鳳爲刑部右侍郎

由左副都御史遷

○貸福建建甯鎮興化城守營兵丁穀價銀○己丑福興張國樑奏逆匪由丹陽竄至金壇當經派往官軍八千餘名統歸總兵虎嵩林督帶進剿乃節節遲延毫無調度致賊於近城西北迤東處所連紮多營阻我進步兩次接仗迄未得手臣張國樑於七月十九日抵金壇催隊前進並越河添築營盤使城內外聲勢相應一面酌撥兵勇繞道入城協力固守以備夾攻二十一日黎明渡河進攻賊壘該逆突出千餘人來撲新營又分三股二千餘眾鈔我河西舊營後路當派參將李定太等分路鈔殺臣張國樑親督眾

軍奮力直前斃匪甚眾立將河西鈔營之賊擊敗其撲犯新營之賊經遊擊戴文英等督領精銳各勇過河衝殺斃匪多名逆勢不支潰亂奔回二十二日分兵中左右三路由東門賊壘進攻該逆出巢拒敵我軍三面兜擊馬隊分兩翼衝突乘勢掩殺直偪賊巢又斃賊數百名所有選帶入城之兵勇二千名均各酌帶軍火先後由南門突入城內都司馮子材亦乘擊賊獲勝之時隨各兵進城協守城內人心大定查該逆自丹陽遁走後並未竄往溧陽其全股屯集金壇意欲奪踞此城爲徐圖內犯之計我兵見於東路各處要隘分紮堵禦儻該逆被勦窮蹙復圖竄回丹陽則北路珥陵延陵一帶仍須駐兵嚴防頃因兵勇無可分撥臣福興臣張國樑酌商或將前此派防宜興之練勇一千餘名察看該處緩急卽飭調回防守珥陵以杜回竄之路此次陣亡之守備李愼等應請

旨飭部從優議卹。上諭內閣此股逆匪竄撲金壇經張國樑督隊攻剿連日獲勝並派都司馮子材等選帶兵勇入城協守卽著該總兵等督飭將弁內外合攻迅掃逆氛虎嵩林赴援遲延情節可惡著怡良福興張國樑據實嚴參懲辦以肅軍令其陣亡之守備李愼把總戴魁額外吳祖賢均著交部從優議卹。○諭軍機大臣等邵燦庚長奏擒匪仍踞雒河請飭史榮椿趕緊折回一摺雒河集賊巢經袁甲三督兵攻毀後英桂會派西凌阿崇安等在彼駐紮以資防剿茲據邵燦等奏雒河地方復有賊踞係黑白兩幟其餘匪黨分竄棠城仍有至雒河聚集之說擒匪飄忽靡常見復回竄老巢何以西凌阿崇安等並不實力防剿任令該匪竄踞著英桂嚴飭各路將弁會同西凌阿等將回竄之匪就地殲除毋令復踞老巢肆行紛擾夏邑永城境內泥台店馬村橋一帶亦有股

匪焚掠難保不互相勾結致匪勢復張並著該撫督飭地方文武分投剿捕毋使蔓延傳振邦見已赴丹陽徐州一帶僅有參將興慶一營兵力未免過單史榮椿見署徐州鎮總兵防剿事宜是其專責著英桂卽飭該鎮迅速赴任會同王夢麟興慶實力堵禦毋許遲誤將此由六百里各諭令知之○諭廉兆綸奏分布閩兵信勇攻守地方並江省近日各路情形一摺所稱閩兵須全畱建昌自因撫建等處均有賊滋擾恐兵力單薄起見惟見在江蘇丹陽一帶情形萬分喫緊必得各路援兵齊集方足以資攻剿前據曾國藩等奏饒郡克復業將福建護副將陳上國所帶閩兵一千五百名飭赴江南軍營已諭令怡良等飛速催提儻此項官兵道經廣信廉兆綸不准截畱防守致誤大局至所奏信勇止二千餘名不能當撫建饒郡三面之衝亦係實在情形著曾國藩文俊迅卽

酌撥兵勇前往廣信協力防剿見在南康饒州均已克復廣東湖南援兵助剿各有起色該侍郎等務當統籌全局設法兼顧趕緊攻克撫建保衛廣饒毋令賊匪再肆紛竄將此由六百里各諭令知之○辛卯諭內閣本年江蘇浙江夏間亢旱節經該督撫等具奏昨又據何桂清奏浙江省城於七月中旬得有透雨此外各屬尚未優霑江蘇各屬亦未據該督撫詳細奏報會否續霑甘霖農田得以補種朕心實深軫念著各該督撫飭屬查勘除補種成熟之區自應照常徵收其被災州縣各按情形輕重分別蠲緩迅速具奏候朕施恩○諭福濟奏江北各屬亢旱請暫免抽稅等語著照所請所有江蘇河南米麥雜糧前赴安徽經過之臨淮正陽各關著暫免抽稅俾得設法招徠以裕民食○諭軍機大臣等英桂奏擒匪復踞雒河分擾臨渙官兵接仗獲勝一摺並福濟奏潁州

等處堵剿擒匪疊勝等語見在擒匪大股復竄雒河一帶業經責
甲三等分路進剿均獲勝仗剿辦尙屬得手自應乘此聲威迅由
西北兜剿惟該匪一經擊敗恐仍向東西奔竄儻僅恃豫兵追剿
皖省各軍不能迎頭截擊仍難一鼓殲除鄭魁士諒已遵旨馳赴
廬州大營總統軍務所有穎毫等處兜剿擒匪著福濟嚴飭郝光
甲珠克登塔思哈等各帶兵勇剋日進剿力遏東南奔竄之路儻
仍前玩泄或以剿辦土匪爲詞遷延觀望不聽英桂調度以致擒
匪分竄他處朕惟福濟是問恐難當此重咎也西凌阿興慶等並
不嚴扼雒河臨渙輒卽移營退守是否實因賊眾兵單抑係畏怯
不前著英桂查明參辦毋稍徇隱將此由六百里各諭令知之○
諭前因江南軍營帶兵大員乏人諭令和春馳赴丹陽茲據福濟
奏稱皖省軍務喫緊請畱和春督辦以資熟手等語惟丹陽大營

關係蘇浙兩省保障見派怡良暫署欽差大臣若令日久支持恐該督精力亦有未逮朕素知和春尙有將畧且曾在向榮軍營江南情形亦能熟悉是以調往丹陽卽欲命其爲欽差大臣俟到江南再降諭旨並非寄以偏裨之任若俟三河克復再令前往深慮遷延遲誤鄭魁士在皖屢著戰功接替和春總統軍務諒能勝任該撫見已病痊亦可與鄭魁士和衷商榷會籌防剿和春福濟接奉此旨著卽知照鄭魁士迅速折回廬州接辦安徽軍務和春俟鄭魁士到營交卸後亦著迅速啟程馳赴丹陽軍營聽候諭旨毋再遲緩將此由六百里諭令知之○癸巳諭軍機大臣等本日據何彤雲奏雲南回匪滋事情形並以所獲匪徒身帶傳單意圖勾結他省回民請飭四川貴州於交界處所嚴查等語雲南回匪攻撲省城後屯踞海口東川楚雄等屬匪徒所在響應若再令勾結

川陝甘肅等處回民前往助逆則勦辦更難措手著樂斌恒春蔣
蔚遠於各該省與雲南交界處所一切關津要隘嚴飭地方文武
員弁設法盤查如有回民欲赴雲南形迹可疑者卽行截回以杜
其糾聚之謀儻各該地方官不能實力稽查致有回民三五成羣
潛往雲南助逆一經查出卽著樂斌等從嚴參辦將此由四百里
各諭令知之○諭據何彤雲奏滇省回匪滋事情形請飭勦辦一
摺據稱該省回匪起事之由皆因歷任地方官袒庇回匪抑勒漢
民以致匪眾毫無忌憚肆行焚殺所奏自係實情當漢回互關之
初彼此尋仇報復自應持平辦理迨至因爭廠而焚殺因焚殺而
戕官則回匪已成叛逆而臨安及大小驛川人並無此事該地方
官何得概目爲匪力持並勦之議又盡撤各鄉團練而轉募回匪
守城自壞藩籬釀成巨患殊爲可恨見在迤東迤西各屬回匪勢

欲燎原海口碧雞關等處逼近省垣皆有逆回屯踞若非大加懲創斷不能使之畏威歛迹卽該撫亦無從下手舒興阿身任封圻豈可漫無調度著卽督飭在事將弁認真剿辦並通飭各屬實力舉辦鄉團以期自相保衛至臨安驛人等止與回民互鬪並無不軌情事著卽出示曉諭使各安本業毋致疑懼驚擾回民人數眾多良莠不一此時逆回勢盛卽良回亦必被其所脅尤應設法開導諭以見在止辦戕官撲城之匪與良回無涉使之不相附和一經解散則其勢自孤該侍郎所保前任知府彭崧毓見在是否尙在雲南如未回籍卽可令其隨同防剿其在籍侍郎黃琮御史寶坻總兵周鳳岐卽著會同各地方官籌辦鄉團以佐兵力恒春見在貴州前已有旨諭令酌度緩急如黔省事有就緒卽速折回雲南見在事機緊要該督是否回滇抑或札商文祥舒興阿妥籌布

置俾兩省軍務各有把握不至顧此失彼並著恒春迅速具奏至該侍郎所劾前任東川府知府汪之旭於回民爭廠燒殺城外百餘村僅辦匪首馬二花與之講和前任迤東道潘楷極力袒護以致勢更猖獗又署楚雄府知府崔紹中助回匪而勦臨安民人撤鄉團而募回匪守城致有撲城之禍著恒春等查明參奏毋稍掩飾將此由四百里各諭令知之○甲午命江南提督和春爲欽差大臣督辦江南軍務○乙未諭軍機大臣等據戶部奏請碾運四川米石以實京倉並遵議龍啟瑞奏採買北省米石各一摺本年江浙兩省雨澤愆期來歲海運漕糧恐難足額該部所請碾運四川成都等屬倉穀聚於重慶由嘉陵江運至陝西鳳縣之南登陸再由渭水運至潼關應入黃河沿河東下至河南孟縣之東北入溴河又北入濟河入丹河卽由河南山東運道以達通州藉濟倉

儲並請照龍啟瑞所請於陝西省城設局勸捐並先行籌款採買由渭河運至潼關沿河而東以抵武陟由武陟陸路運入衛河卽由臨清運通其河南之懷慶彰德等處皆有糧石可買應請勸捐和糴等語均爲亟籌積儲起見惟川陝運米至京事屬初始該部所指運道有無阻礙其舍舟登陸雇船裝載並一路應需經費若干均應先爲籌及著樂斌吳振械英桂按照摺內所陳詳細體察情形妥速議奏至四川倉穀見可碾運若干陝豫二省採買勸捐就見在地方情形而論有無窒礙並如何酌議章程辦理之處著一併妥議具奏京倉儲備關繫緊要該督撫等務當實心籌畫以濟時艱毋得空言塞責視爲具文戶部摺鈔給閱看將此各諭令知之○以兩淮各場被旱命畱淮北折價銀一萬兩撫恤蠲丁○丙申諭內閣前因會國藩奏參江西巡撫陳啟邁欺飾各款當經

降旨將陳啟邁革職交新任巡撫文俊查辦茲據文俊逐款查明覆奏如趙如勝都昌敗挫及吳錫光克復饒郡赴援義甯各情均與原奏相符並無虛飾至陳啟邁咨請會國藩豫籌軍餉係因庫款支絀起見並非不肯給餉其調派羅澤南一軍及議暫停成造戰船與會國藩往返商酌意在設法變通義甯被圍曾經派員救援南康等缺亦經委員接署辦理尙無錯誤惟該革員於吳錫光所帶貴勇與龍泉勇互相爭鬪戕害多命雖經拏獲首犯正法並未奏聞究屬不合萬載縣匪徒入城搶劫該縣知縣李皓匿不稟報事後始請解任先未查明參奏又義甯保舉案內陳啟邁將伊幕友陳本淳胡應奎列名保奏雖查非冒濫惟不知引嫌均屬不合陳啟邁業經革職著毋庸議卽行飭令回籍○諭軍機大臣等恒春奏滇省回匪猖獗請飭調川兵協剿並懇速籌經費一摺雲

南各屬回匪滋擾勢極鴟張恒春見在貴州勦辦正當喫緊自未便遽令折回惟滇省存兵無多恐不敷勦辦著樂斌趕緊抽調四川精兵二千名揀派得力大員統帶由霑益一帶入滇進勦毋稍遲誤又據恒春奏調兵二千每月需用軍餉六千兩上下此項軍餉卽著樂斌就近籌畫三四萬兩撥往雲南以資接濟至漢回尋仇互鬪疊次諭令舒興阿勦撫兼籌妥爲辦理見在逆回戕官撲城固應痛加懲創但須分別良莠解散褻脅之徒以孤其勢勦辦自易爲力恒春旣未能回滇舒興阿身任封疆責無旁貸務當先就見有兵力妥籌勦辦毋得專待川省援兵遷延貽誤將此由六百里各諭令知之○以倭仁爲盛京禮部侍郎

由光祿寺卿遷

○戊戌諭

內閣崇恩奏撥運皖省米麥請改解折色銀兩一摺前因安徽省奏請協濟兵食諭令崇恩籌辦米麥各一萬石運解廬州茲據奏

稱途長難以轉運擬請改解折色著准其照部定折價每石折銀一兩四錢於山東省應解安徽餉銀內劃撥銀二萬八千兩迅卽派委妥員徑解廬州軍營交安徽巡撫福濟自行採買○已亥諭內閣和春福濟奏請將帶兵遲延之員弁等分別懲處等語甘肅西甯鎮總兵珠克登經鄭魁士催令赴援蒙宿竟敢藉詞駐守正陽又不撥兵援擊陝安總兵郝光甲由壽州前赴蒙城遊擊吉昌等不能嚴催兵丁輒據要挾之詞率行瀆稟均屬遷延不進咎有應得珠克登著交部議處郝光甲業經革職畱營仍著交部議處陝西畧陽營遊擊吉昌孝義營都司慶瑞宜君營守備彭明陞陝安營守備康宗路均著摘去頂帶以示懲儆○諭軍機大臣等和春福濟奏蒙城潁上等處勦擒獲勝並帶兵員弁遷延不進各摺片捻匪攻撲蒙城經兵勇奮擊解圍各路勦匪亦均獲勝仗但敗

竄之匪尚在宿境臨渙等處屯踞另股復竄檀家集捻首張落刑往來其間飄忽靡定且雉河老巢復有賊踞是皖豫之間賊氛尙熾亟宜合力勦洗以淨根株前已降旨授和春爲欽差大臣卽令馳赴江南軍營本日復命鄭魁士會同福濟督辦安徽軍務該署鎮接奉前旨諒已折回廬州和春交卸後卽著迅速啟程前赴丹陽接受關防毋稍遲誤至勦辦捻匪已令袁甲三就近調度必須皖省官軍合力方能聚而殲旃鄭魁士已由懷遠折回著福濟另派得力大員統帶兵勇督飭郝光甲珠克登塔思哈等聽候袁甲三會同英桂調遣如再遷延誤事必將郝光甲等從重治罪粵匪久踞三河外援頻至該省被脅愚民聞有蓄髮輸糧甘心從逆者是以賊黨日增兵勇不敷抵禦若不亟思變計勦辦伊於胡底前據文慶等奏請實行團練業經寄諭各督撫各按地方情形酌辦

福濟身任封圻實無旁貸著於督兵進剿外畱心選擇賢能大員分投督辦如此次蒙城解圍卽係團練得力可見民團與官兵實堪相輔而行果能招集流亡實力團練小民有所依歸不至流而爲匪賊黨日孤賊援日少勦辦自易爲力此實軍務轉機該撫務當力籌辦理毋得視爲緩圖將此由六百里各諭令知之○命提督銜署安徽壽春鎮總兵官鄭魁士會同巡撫福濟督辦安徽軍務○庚子以赴援金壇不力革湖北宜昌鎮總兵官虎嵩林職仍畱任○辛丑諭軍機大臣等戶部奏遵議內閣侍讀學士梁同新奏請採買洋米一摺本年江浙亢旱來歲海運恐難足額自應設法採買以實京倉廣東爲洋米積聚之區潮州米穀素稱饒裕且曾有採買運浙成案卽可仿照辦理著葉名琛柏貴體察情形如洋米來源豐旺價值平減米質堅實卽於粵海關項下籌款收買

數十萬石或照福建捐米成案設局勸捐並察看潮州一帶地方米穀是否充足著一併設法籌辦由海運至天津以裕倉儲至洋米質地恐不能耐久易致黴變必須挑揀米質堅潔者妥爲運送其米價運費著卽通盤籌計酌定章程先行具奏將此諭令知之○諭英桂奏捻匪鴟張請派兵助剿一摺已諭知穆隆阿等迅調察哈爾馬隊二千名赴豫協剿矣捻匪回竄雒河臨渙等處裹脅日眾股數甚多徐州當北面要衝見存兵數無幾專防則無從會剿出剿又不敷分防自應亟籌添調著崇恩卽將曹單一帶沿河防兵酌撥數千名迅速渡河歸併徐州聽候英桂分撥布置其曹單扼要處所或卽責成民團實力堵禦或應添撥兵勇以補調出之數亦著崇恩酌量妥辦捻匪蹤迹飄忽靡常急須痛剿英桂等不得專待續調之兵稍涉延緩著先就見有兵勇偵賊所向分途

邀擊先將雉河臨渙兩處境內剿除然後合力南趨杜其旁竄該
匪股數雖多脅從不少或先剿大股以挫其鋒或分剿小股以殺
其勢諒茲烏合之眾不難漸次解散至所調察哈爾馬隊官兵趁
此天氣漸涼用之南方必可得力總宜迅速蒞事俾得及時歸伍
毋令久畱將此由六百里各諭令知之○諭英桂奏請添調馬隊
官兵一摺據稱捻匪大股見由亳州向西北一路竄擾平原曠野
匪蹤飄忽靡常非添調馬隊痛加剿洗難迅速蒞事等語所奏自
係實在情形著穆隆阿慶昫將察哈爾備調馬隊官兵二千名備
齊軍裝器械馬匹揀派各該營得力總管星速管帶來京馳赴河
南軍營聽候英桂調遣藉資攻剿再前據該署都統等覆奏請於
捐輸馬匹內挑馬二千三百匹給官兵乘騎並派總管約遜等統
帶備調卽著將此項官兵馬匹分起來京前赴河南毋稍稽延將

此諭令知之○予安徽陣亡通判倉景涵祭葬世職○癸卯諭內閣見在所調察哈爾馬隊官兵已經到京著派御前侍衛穆騰阿乾清門頭等侍衛托精阿會同察哈爾總管管帶官兵前赴河南西凌阿軍營聽候調遣○諭勞崇光奏克復上思州城殲擒賊犯一摺廣西上思州地方土匪肆擾各鄉於上年七月乘閒闌入州城屢經攻剿窮蹙本年四月各員弁兵練等奮力圍攻當將城池克復辦理尙屬認真出力員弁紳團著該撫擇尤保奏該州知州武衛雖屬疏於防範尙能隨同克復著革職免其治罪千總蘇遠俊黎光彰外委鄧玉邦疏防賊匪入城咎有應得著卽斥革仍著該撫查明該弁等如有退避情節卽行從嚴參辦○諭勞崇光奏官軍紳團克復縣城一摺上年八月閒廣西艇匪竄踞貴縣城池本年二月閒署知縣李嘉年督率團丁水勇沈毀賊船多隻斃匪

一千四百餘名生擒八十二名當將縣城收復署貴縣知縣候補同知李嘉年典史谷昌齡城守外委林奇貴失守城池立即克復均著從寬革職准其畱任其捐貲及打仗出力各紳著准其擇尤保奏毋許冒濫○諭軍機大臣等朕聞直隸大名順德廣平所屬多有盜匪聚眾塗面搶劫之案該處界連河南民情素稱強悍本年被旱被蝗已成災象誠恐饑民聚而爲匪畿輔重地應如何緝捕奸宄安撫災黎悉臻靜謐見在各屬有無稟報盜案及早蝗成災之處著桂良查明具奏毋許稍有粉飾並著飭屬嚴拏搶劫案犯務使匪徒斂迹毋致釀成巨患其毗連河南地方尤應稽查防範以杜搶匪勾結亦著嚴查籌辦毋稍大意將此諭令知之○諭前因江南軍營需兵甚急疊經諭令葉名琛撥兵四千名派提督崑壽統帶由海道前往本日據葉名琛奏潯州匪勢猖獗平南危

急崑壽已由省赴潯督勦等語自係尙未接奉前旨見在江南大軍退守丹陽逆賊日圖內犯分股竄撲金壇蘇常所屬所在震動大營兵力實屬不敷分撥崑壽旣未能一時赴蘇所有前調廣東兵四千名葉名琛業已如數調撥著卽飭由海道迅速前進至帶兵人員著另派得力大員或卽令前諭派出之參將衛佐邦等分起帶往崑壽俟潯州賊勢稍平仍應卽赴丹陽著葉名琛隨時查看情形具奏將此由六百里諭令知之○甲辰諭內閣怡良奏遵旨保舉將材等語據稱考覈在營將士有參將李定太等六員屢著戰功茲金壇解圍該參將等或身先士卒或力保危城可備干城之選湖南參將李定太廣西參將米興朝廣東參將李若珠均著以副將儘先升用先換頂帶四川遊擊虎坤元廣東遊擊戴文英李鴻勳均著賞加副將銜以參將儘先升用○怡良奏八月初

三日臣張國樞督令參將魯占龍等分投攻撲金壇東門賊壘因牆高濠闊未能得手初四日各路援兵將次到齊城內遊擊李鴻勳等瞭見西門外逆匪赴鄉擄掠卽派張朝光等督帶兵勇潛出西門分兩路攻擊西街賊巢該逆猝不及防被我兵搶入連撲賊巢十餘處大股逆匪盡擁來援我兵收隊回城該逆跟追近濠武生陳震指揮團丁施放槍礮連斃數賊始行擊退該武生亦被賊礮中胸登時陣亡初五日出隊在南門外移紮營盤四座該逆率黨五六千人前來攻撲我軍奮勇直前槍斃騎馬黃衣賊目乘勢進剿該逆敗退搯橋而守李定太匹馬當先督帶兵勇數十名搶上橋梁砍殺劇賊十餘虎坤元從後掩殺該逆敗退回巢臣張國樞乘機直擣南門賊壘督飭虎嵩林率領李定太等四面圍攻該逆倉皇失措我軍乘勢砍殺賊匪不計其數餘匪竄入第二座巢

內我兵進攻適城內遊擊李鴻勳督率馮子材等帶同團丁從南門橫衝而出一併擁至賊壘李定太等帶勇躍過濠溝拋擲噴筒火罐壘中火起我兵乘其慌亂大隊壓入將巢內之賊盡行殲斃進攻第三座逆壘各兵勇從槍礮叢中踰牆而登該逆驚潰眾軍破柵而進刀砍矛刺賊屍徧地餘匪奔逃壘後土岡有礮臺一座該匪排列大礮連環施放我兵未能撲近臣張國樸密令李鴻勳等選帶藤牌手從岡後鈔上該逆卽由兩旁逃竄將逆壘第三座礮臺平毀東西兩門之賊二三千趕來救援我兵首尾夾擊該逆披靡奔回舊巢統計是日斬馘首級一千五百顆生擒賊匪二十名至初六日子刻逆匪宵遁城圍立解臣張國樸卽飭虎嵩林等倍道追剿直至茅山剿殺不下千名該逆分作兩股一走句容一由茅山南路旁竄李定太等帶領馬隊自茅山開道兼程追襲斃

匪三四百名餘俱爬山越嶺四散逃竄

臣

張國樑查茅山南路近

接溧陽卽令虎嵩林酌帶兵勇馳赴溧陽會同明安泰相機堵剿

其李鴻勳一軍仍回金壇

臣

張國樑卽親統各軍由延陵珥陵一

路折回丹陽相機進取句容所有守城陣亡之金壇縣武生陳震

相應請旨從優議卹

卹

上諭怡良奏金壇剿匪大勝縣城解圍其

敗逃餘匪追殺又及千名所辦尙屬得手著怡良仍飭張國樑等

督軍將敗殘餘匪搜除淨盡乘此聲威各路堵剿力圖進取毋令

逆勢紛竄蔓延所有出力員弁兵勇著准其擇尤保奏候朕施恩

陣亡武生陳震著交部從優議卹○乙巳諭軍機大臣等何桂清

奏甯國涇縣續獲勝仗並皖南各路軍情一摺甯國賊勢雖窮城

池未復周天受一軍雖能力保涇縣而南陵青陽賊援麇集連日

剿擊該逆仍竄往青陽擾入太平境內旌德績溪等處均應嚴防

秦如虎駐紮建平仲孫懋駐紮鍾橋止能力扼要隘自係實在情形昨據怡良等奏金壇解圍已飭秦如虎由定埠進取東壩此時仍當飭令明安泰約會該副將擊退東壩占踞之賊杜其內竄建平爲入浙要路李恒淞旣回涇縣該撫卽飭派防廣德之臬司慶廉等嚴密布置一面飛咨鄧紹良策勵全軍乘賊窮蹙之時攻克甯郡庶外援之賊失其所恃不至再生覬覦至徽軍兵單其南陵青陽竄匪並著該撫察看緩急飛咨鄧紹良酌量辦理毋稍疏懈將此由六百里各諭令知之○丙午諭內閣前因揚州軍營失利雷以誠接應遲延並捏稱助剿收復揚城當經降旨革職等因交德興阿等嚴訊請旨又因御史方濬頤何桂芬奏雷以誠軍營委員雷鳳翥等勒捐發餉種種營私甚有釀傷人命重情復請令德興阿等一併提訊節據奏稱本年二月閒三汊河失陷雷以誠退

至沙頭後不卽督勇進攻遷延累日實屬失計其收復揚城但憑
勇目稟報之詞輒稱會兵追剿亦屬奏報失實又於伊姪雷鳳翥
伊婿黃鍾在營舞弊毫無覺察實屬孤恩雷以誠著發往新疆效
力贖罪委員黃鍾在霍家橋專辦捐輸得受規費擅押吳永貴掌
責地保又在揚城置買田產厥咎甚重業經病故著無庸議雷鳳
翥那湊支發局銀兩交監生石光達營運濫給家人張安功牌發
放勇糧變通支給並未申報又在揚城置買房屋實屬牟利營私
著卽革職交刑部定擬罪名具奏石光達爲雷鳳翥營運圖利徐
震甲因勸捐責打杜成祿騷擾地方吳雲總辦畝捐於徐震甲辦
理不善未能察出黃斌於伊弟黃鍾置買田產並不阻止翁壽康
襄辦支發局務並不經手會行均有不合該員等應得罪名著該
一併分別定擬黃鍾雷鳳翥在營當差輒敢私置田宅實屬違例

著將所買田宅及寄存銀兩一併入官○諭李鈞崇恩奏勘明微山湖新淤尺寸請加收湖水並繪圖呈覽一摺微山湖爲宣濟山東八牕及水南邵宿運河水櫃連年因豐工漫水灌注淤墊深厚若竟照新淤尺寸加收不獨濱湖地畝恐多被淹且湖隄喫重防守不易著准其酌量加收湖水一尺統計湖底新舊淤墊以誌椿水深一丈五尺爲度以備接濟漕運○官文都與阿楊載福胡林翼奏七月十六日武昌城賊開四門分路以撲洪山填濠併進直薄我營李續賓自率湘右營前左四哨截於田隴賊礮於濠中者約二百餘名我軍乘勝越濠追之城賊又出大股繞小龜山以襲我後李續燾從旁橫擊偪斃於沙湖者二百餘名其由中和門出城之賊趙克彰等分繞巴頭山截殺追至城下斃賊四百餘名臣楊載福於是日派都司李濟清由沙口出隊往青山防守因青山

港有鬼水偷渡入城之賊李濟清卽率三板十餘隻入港轟斃賊二百餘名生擒長髮十數名十七日僞檢點古澹賢率賊千餘循城北青山油坊嶺江岸修築土壘臣楊載福率遊擊鮑超等自沙口出隊至青山會合李濟清入港轟擊鮑超等復登岸奮擊將油坊嶺賊巢盡行燒毀十八日魯家巷援賊益多並新添三壘臣卽添派訓營李續賓亦抽分營哨前往助剿屢戰三時賊稍卻我軍同時並進立破其中右二壘馬隊馳驟衝殺斃賊約三百名乘勝追至黃家店又破賊後路三壘是日臣楊載福亦親督陳金龍帶三板數隻首先衝入港內對賊壘轟擊李濟清派勇由上青山登岸繞出賊後焚燒賊巢將賊壘浮橋概行燒毀十九日賊又以民划入南湖湯孫湖潛泊岸旁冀於夜閒放入湖中驚臣後路瞿定國等於夜半突出百餘人挾火具登岸焚其划船殆盡二十日東

湖船二十餘號由閘橋直趨魯家巷左壘援賊亦出二萬餘撲魯家巷各營臣卽飭瞿定國先夜以三板挽入東湖繞擊賊船之後陸師則以礮沿湖轟之及賊船將近各勇解衣涉淺爭奪賊舟傷斃水賊百餘燒賊船三隻餘船仍奔入港二十四日瞿定國等又奪獲賊船四隻斃賊三十餘名二十五日副都統銜護軍參領舒保之馬隊全數至洪山安營二十六日赴魯家巷出賊不意踏其一卡生擒偽司馬李沆發斬之二十八日援賊城賊四面紛出約二三萬李續賓嚴陣以待約一時許號旗一揮各營齊出趙克彰奮勇爭先立斬衝鋒悍賊數名蔣益澧等率營鈔截護軍參領舒保率馬隊四面衝突賊遂大敗伏屍滿途李續賓等各率兵勇分路邀截姚家嶺窩灣沙子嶺小龜山之賊賊殊死鬪一股敗退一股繼進酣戰良久馬隊數十騎復橫掠沙子嶺而過槍箭並發余

雲龍亦率勇從東湖繞姚家嶺而上從旁襲之賊遂大亂紛紛退走追至小龜山腳惟鮎魚隄一綫之路敗賊擁擠自相踐踏偪斃於沙湖及槍礮轟斃之賊約七八百名蔣澤澐朱品隆追過雙鳳山左右斃賊亦約二三百名統計各營斃賊約一千數百名斃黃衣騎馬賊目數十名是日各路之戰如魯家巷之援賊則張榮貴率勇迎勦踏破賊壘四座斃賊二百餘名其東湖之賊船出護陸賊經瞿定國焚燒三十隻其湯孫湖匿港之賊划則姚教忠轟毀七十餘隻斃賊三百數十名追至舒家橋縱火將賊划燒盡又登岸燒其賊巢八十餘戶臣楊載福是日亦率李濟清等破賊上青山三壘追至油坊嶺渡口毀其浮橋陳金龍率船攻壇角之賊亦破其一壘八月初三日李續賓等赴魯家巷助勦三路齊進追逐十餘里踏平賊壘六座斃賊六七百名初六日三更偵探賊之後

路四營已動賊將遁矣壘中賊聲甚囂更鼓已亂初七日丑刻急飭張榮貴會合各營分三路進剿舒保率馬隊由洪山馳往接應天尙未明我軍連破大壘十三座小卡無數斃賊千餘名匪徒漫山遍野紛紛下竄馬隊追及於土橋殲其後隊無一脫者賊奔益急七八十里之地無一返顧迨追至華容則已百餘里矣計斃賊千數百名生擒六十餘名偏溺內湖者不可數計此七月十六日至八月初七日水陸合攻馬步合剿大破城賊援賊之情形也該逆石達開初至氣燄頗熾仰仗天威旬日之內大小二十餘戰大挫逆鋒解散脅從約計萬人敗賊尙有萬餘已至大冶興國而臨江賊首偽侯黃玉峴復以大眾至興國會合賊情詭祕尙宜嚴防所有統帶馬隊之副都統銜護軍參領舒保等可否分別獎勵其力戰陣亡黑龍江六品藍翎甲兵倭索爾札嗎立付善烏勒希

遜依郎阿巴彥吉爾噶應請照驍騎校例議卹遊擊劉錫文等並請分別議卹守備李登關戰功素著因傷成廢可否比照實缺守備例在籍食俸 上諭胡林翼等奏官軍大破援賊並分攻合剿情形一摺此次旬日之內大小二十八戰水陸皆能用命兩馬隊之功居多解散脅從約計萬人仍著胡林翼等督軍悉數殲除趕緊克復城池毋再延玩○諭軍機大臣等胡林翼等奏軍火需用浩繁請飭按月籌解等語湖北水陸各師攻剿賊匪所需軍火每月多至十萬斤自應寬爲籌備著樂斌吳振械駱秉章於四川陝西湖南三省按月各籌解火藥三萬斤每月初旬批解啟程赴湖北交納以資攻剿毋誤要需將此由五百里各諭令知之○以攻剿湖北武昌援賊出力賞道員李續賓布政使銜參領舒保西林布花凌阿巴圖魯名號餘升敘有差○予陣亡遊擊劉錫文等祭

葬世職○丁未譙軍機大臣等恒春蔣爵遠奏都勻施秉兩處失守各一摺蔣玉龍等前往鎮遠一帶勦辦因尹坡營盤被失由老城退紮郡城今施秉復陷鎮遠黃平之路已斷必應嚴飭該副將等力圖進取毋得但事退守致令賊勢益張都勻距省僅二百餘里乃因誤信投誠匪黨內應以致失守此時麻哈貴定等處均經震動省城根本重地著蔣爵遠嚴密布置實力防守毋得稍有疏虞提督孝順駐守麻哈卽可就近堵禦一面聯絡各路將弁奮力進攻陳得功已由雞場調赴谷硐文德一帶佟攀梅之軍亦已從貢背繞往文德與陳得功會合該督撫務卽飭令相機克復不得徒以餉絀兵單藉詞延誤將此由六百里各諭令知之○諭蔣爵遠奏火藥短絀請於鄰近四川各營借撥運解一摺黔省勦匪正當喫緊之際川滇黔三省兵勇雲集火藥需用甚鉅著樂斌於毗

連黔疆之川東鎮瀘州等營借撥火藥三萬斤火繩二萬盤剋日
委員迅速運解赴黔以資剿辦毋誤要需將此由五百里諭令知
之○福濟奏擒匪勢甚蔓延數月以來東奔西竄統計懷遠壽州
宿州阜陽潁上太和霍邱亳州等處幾於徧地賊蹤英桂統兵會
剿見駐陳州距擒匪滋擾之蒙宿幾及四五百里聲息不通實苦
鞭長莫及張落刑見在宿州臨渙集盤踞附近之靈璧鳳陽處處
戒嚴此時豫軍在亳皖軍在蒙宿中隔匪眾急切不能會合是擒
匪情形正在萬分喫緊查此股匪類雖多烏合之眾惟張落刑會
在周天爵營充當勇目我軍強弱虛實素所深悉此時既慮南奔
更防北竄如旬日之間擒勢稍衰鄭魁士可以折回廬州再行籌
議如彼猖已甚臣卽酌帶兵勇馳赴臨淮一帶接替該總兵一面
相機前進督率珠克登郝光甲塔思哈等奮力進攻並與徐州駐

防之兵聯絡策應以遏北竄 上諭逆匪奔突靡常必應南北會剿況和春急須馳赴江南鄭魁士折回廬州不容遲緩著照所請該撫卽帶兵前往北路督剿捻匪速飭鄭魁士接替和春不致遲延誤事蒙宿一帶捻匪勢尙披猖該撫到彼務當嚴飭珠克登等奮力攻剿並隨時知照英桂會同豫省官軍合力兜擊以期盡殲醜類該撫啟程後廬州城守事宜卽飭畢承昭恩錫率同金光飭等實力巡防毋稍疏懈三河賊匪屢有外援踵至廬州爲江北屏障地方緊要俟剿捕捻匪大勢已定該撫卽回廬州與鄭魁士會籌剿辦毋得遷延時日致有顧此失彼之虞另摺奏皖北荒旱情形懇發內帑給賑等語該省連年被兵今復亢旱成災黎民疾苦異常發帑賑濟原所不惜惟本年直隸山東江蘇浙江等省均被水旱勢難專顧一省該撫先行督飭藩司查明被災輕重分別奏

請蠲緩以安民心其撫恤一項再行聽候諭旨朕軫念民依雖當度支絀乏之時亦必酌量撥給俾各省災黎均霑恩澤也將此由六百里諭令知之○命已革山東巡撫張亮基赴安徽隨同巡撫福濟辦理軍務○以捐輸軍餉永廣山西河東商學十名○以貴州都勻施秉府縣二城被匪竄陷總督恒春巡撫蔣蔚遠下部議處○戊申諭內閣和春福濟奏官軍克復三河一摺安徽逆匪自廬州克復後竄踞三河經和春節次攻剿屢有斬獲八月十一日官軍築壘直進該逆大股來撲參將程智泉等督帶兵勇奮力攻擊殲斃六七百名餘賊敗退十七日夜和春督同麟瑞等攜帶雲梯潛伏而進復令熊天喜江忠信等攻打南路兵勇越過濠溝齊抵街口施放槍礮火器頃刻賊營火起賊眾驚亂越牆逃出者均被兵勇砍殺我軍四面豎立雲梯翻牆而入賊眾紛紛逃竄官軍

搶進石壘合力截殺斃匪無算當將三河克復餘賊向巢湖上船
意圖逃脫我軍趕至連開槍礮擊沈燒燬賊船多隻落水死者不
計其數先後殺賊五千餘名砍獲首級三千餘顆生擒僞指揮張
太有僞將軍秦驪盛等十五名匪黨二百六十餘名剿辦甚屬奮
勇著福濟會同鄭魁士趕緊乘勝進取以期次第肅清所有在事
出力文武員弁兵勇准其擇尤保奏○諭軍機大臣等前據瑞麟
慶祺奏盱眙縣之蔣家壩濱臨洪湖與水路之邵伯鎮同爲清江
門戶必須嚴密設防則清淮自可捍衛已由庚長等親往相度辦
理等語本日據邵燦庚長奏已將汜水鎮兵勇調回清江以防蔣
壩並於戴家灣水陸各路安礮釘鐵分撥漕船巡察布置尙爲周
妥著卽照所議辦理仍著嚴飭派往之參將伊米揚阿會同該府
縣將督帶防勇勤加操練一面激勵民團互相聯絡不得始勤終

怠虛應故事至蔣壩地方抽捐釐稅係爲清江防堵之用前據福
濟奏皖省乏食請停該處米麥雜糧釐捐以恤販運未經允准此
項釐捐如果停止是否與清江防費有礙抑或專停糧石釐捐而
抽收他貨尙堪應用著邵燦庚長體察情形奏明辦理將此諭令
知之○于安徽陣亡參將程智泉等祭葬世職○已酉諭內閣戶
部奏部員職等議敘與例不符請旨遵辦一摺所奏甚爲平允前
經湖北保奏團練出力之戶部額外主事李廷簫浙江保奏海運
出力之戶部額外主事王文韶均請以該部主事儘先補用茲據
該部查明與例未符李廷簫王文韶均著俟學習三年期滿後准
其以該部題選各缺奏請補用在該員等到部三年卽行超補邀
恩已屬至優而於部務亦不至生疏至各部議敘人員有似此躐
等保奏者著吏部查明一體遵照辦理嗣後各省軍營大臣及各

督撫等保舉京員不得以額外人員奏請卽補本衙門題選之缺如實有勞績較著須從優獎勵者止准以各部通選之缺儘先銓選仍不得占本衙門題缺以示限制○諭軍機大臣等廉兆綸奏廣信被匪竄擾練勇潰敗一摺據稱甯都州會匪勾結革勇疊陷廣昌南豐新城瀘溪等縣廣信練勇在貴溪之張家橋及港口地方兩次失利該學政見在鉛山截集潰勇等語廉兆綸本係學政並無統兵之責因其適在廣信是以准其練勇籌防所有廣饒等處戰守事宜仍應會國藩文俊調度豈能盡委之該學政遂謂可保無虞今此股會匪突起竄擾該學政遠駐鉛山郡城是否失陷抑係被圍摺內均未敘及雖經咨調饒廷選防守玉山兵二千名赴郡援剿仍恐兵力尙單著會國藩文俊卽行派委大員統帶兵勇馳赴該郡迅圖撲滅該郡爲通浙要道會國藩不得以無兵可

撥坐令匪勢引至饒廷選既於初八日移營廣信玉山防兵又形單弱著何桂清酌量添派官兵前往駐紮以爲饒廷選後路兼保衢州門戶俟會國藩等派兵到後該郡肅清饒廷選仍可回駐玉山諒該撫必能斟酌緩急妥籌兼顧也將此由六百里各諭令知之○山東巡撫崇恩奏曹單防兵無多請仍畱本境以固藩籬得旨覽奏尙係實情著如所請畱防本境○予江西陣亡訓導郭守謙祭葬世職○庚戌諭內閣各省舉行大計所以保薦循良汰除庸劣爲三載考績大典全在封疆大吏秉公甄勅察吏卽以安民儻該督撫等平日於屬員賢否漫不經心臨行亦止奉行故事甚至開奔競之門而黜惻愍之吏其於吏治滄漓關繫匪淺轉瞬大計屆期各直省督撫於所屬人員務各認真察看果有勤求治理民情愛戴者始准覈實薦舉毋許濫竽充數至辦理軍務省分

或地方甫經收復有待撫綏或疆圉逼近寇氛亟籌保衛得一賢能之吏實足庇廕一方尤當將實心任事各員畱心存記於舉行計典時列入上考以備擢用其或以逢迎爲要結罔惜聲名以便佞爲才能毫無政績若令忝居民牧必致貽誤地方亟應隨時淘汰以肅官常不得因其尙無顯著劣蹟一味姑容僅以年老有疾人員參劾充數似此循名責實分別勸懲庶吏治蒸蒸日上朕實有厚望焉將此通諭知之○諭軍機大臣等英桂奏馬隊官兵剿匪獲勝見籌分路進剿一摺該匪意圖西竄豫境蓄謀已久此次格綳額等馬隊以少擊眾亳州鹿邑道路已通或可杜其西竄之念自應乘勝進攻偪令南奔四路兜圍可期得手福濟前奏擬馳赴臨淮接替鄭魁士此時諒已移營前進著卽督飭珠克登等由南路進兵其豫省官軍卽可由北而南分投夾擊徐州官軍較單

前次英桂奏請添調曹單防河兵勇昨據崇恩以該處防兵無多
本境尙須彈壓奏請免調業已允其所請英桂見奏飛咨史榮楷
移師前進著卽就見有兵勇妥籌調撥三省官軍會合兜剿福濟
英桂務當合力同心毋存意見以期迅速肅事至英桂奏調察哈
爾官兵業據穆隆阿等具奏已分起剋日啟程矣將此由六百里
各諭令知之○雲貴總督恒春奏古州廳失守自請嚴譴得旨近
因施秉等處失守已將汝交部議處此次勿須再加譴責汝惟嚴
督將士迅速掃蕩廳城文武實在下落仍著確查○辛亥諭內閣
和春福濟奏攻毀廬江賊壘克復縣城一摺官軍自八月十八日
攻克三河石壘後卽於十九夜聞乘雨進兵馳攻廬江二十日黎
明齊抵城外奪獲賊壘五座兵勇豎立雲梯爭先登城逆匪自相
踐踏死傷枕藉其逃出東南兩門者經官軍數路夾擊殲斃無算

立將縣城克復此次官軍於三日內連將三河廬江攻克實屬奮
勇所有在事出力員弁兵勇著准其彙案保奏○會國藩文俊奏
逆匪自去冬今春攻陷吉袁瑞臨等府因水路不得逞志於我遂
於吉安臨江瑞州三府造船鑄礮並於生米司瑞河口臨江河口
深溝高壘密排礮位專擊官軍船隻而護瑞臨賊舟爲衝出省河
之計七月初一日賊由松湖帶戰船三十餘號陸賊千餘將抵瑞
河口江軍水師候補道劉于濤派李鴻泰等傍山迎敵百礮轟發
擊斃溺斃之賊各數十名熊吉華管帶小划督勇登岸殺斃陸賊
多名餘匪逃避山中燒毀賊匪大快驍船二號奪獲大戰船二號
三板小划三號大礮十二尊其生米河沿之賊被楚軍遊擊劉國
斌礮船日夜轟擊賊眾膽寒遂於初五夜棄營而遁我軍追獲大
礮四尊火藥五十九桶大小彈槍械旗幟尤多七月二十七日劉

于潯親督守備李鴻泰等營戰舟小划前往臨江河口巡哨該逆於南北兩岸堅築礮臺二座外設浮橋內牐木板又於裏河爲連珠小礮臺五座劉于潯傳令往樟樹鎮會齊派曹篤清等船上前引賊至浮橋口門佯爲膠淺回船退走賊果擁出追趕我軍小划隨卽進口斬斷浮橋各船銜尾進剿陸勇分投登岸夾擊賊船進退無路殺斃擊斃溺斃之賊約四百名奪得大小戰船九號大小礮位四十七尊米煤等船十三號燒毀數十號二十八日賊匪退守臨江城下劉于潯派王炳等以三板徑入內河陸勇伏於南岸隄下賊果水陸來追我軍回棹返擊縱火焚賊划二十餘號奪獲大礮六尊米煤船十餘號子藥十餘石下游水師之駐紮吳城者七月二十七日惠潮嘉道彭玉麟帶後營衛導營赴下游巡哨行至南康循東岸而下遙見謝師塘陸賊上犯賊舟亦自西岸神林

湖列陣而出彭玉麟率各營哨對敵逾時賊舟敗北我師乘勝窮追去吳城老營已隔一百三十里捩舵收隊行不數里南風忽起該逆見南風之不利於退師也遂回棹返攻極力猛撲礮如驟雨我軍亦停棹對擊煙燄蔽空湖波大作軍心搖惑幾至不支彭玉麟傳令大舟下碇與之坐戰陣腳稍定各三板亦回頭奮擊銜枚無譁千礮雷震賊勢蹙復敗我軍揚帆佯作欲追之勢待賊舟奔北已逾二十里始行收隊五更乃抵老營查江西水賊以湖口逆舟最爲兇悍而吉安臨江瑞州三府修造船礮各治水軍以圖上下夾擊困我省垣臣等派彭玉麟駐吳城以防湖口劉于濤駐豐城以防贛河臨江河劉國斌駐市汊以防瑞河數戰俱勝從此瑞臨兩河賊舟不足爲害上游漸易肅清候補道劉于濤以寡禦眾士卒樂爲效命懇恩賞戴花翎以示鼓勵其所部出力員弁及彭

玉麟所部出力之員可否容臣等覈保數人出自逾格 天恩

上諭江西逆匪修造船礮於生米司瑞河口臨江口等處築壘經候補道劉于潯等督派水軍進剿將賊壘盡行掃除其謝師塘之賊亦經彭玉麟奮擊敗竄此股逆匪膽敢於省城附近地方築壘候補道劉于潯水陸夾攻以次掃蕩剿辦甚爲得力著賞戴花翎出力員弁著會國藩擇尤保奏○會國藩文俊奏楚軍初至瑞州時該逆方大舉撲犯省城於省河之對岸數十里內築立賊壘五六處其塘頭凌一壘去省垣十里日來沙井橋戰僅隔一河臣等欲派兵勇迎接瑞州之援師必先攻破沙井之賊壘七月初四日派兵二千餘人進剿直抵塘頭凌踏破逆壘二座初九日添派新字營虎字營合四千人前赴瑞州十五日到郡與鄂省援師會合十七日該逆以江軍新到營壘未堅遂出大隊六千人猛撲新到

江軍之營各營分路抵禦守備李大雄力衝中堅賊卽潰散殺賊五百餘人二十七日楚軍派三成隊出迎餉項賊又分股來犯湘勇寶勇鏖戰多時都司李新華等從東北鈔出槍礮兼施賊眾大敗江軍由北門追至西門與湘寶各營會合殺賊共五百餘人餘眾狂奔入城查湖北援師四月初開自鄂省起行追賊繞至長沙旋復馳至江西酷暑行軍轉戰千有餘里克復咸甯蒲圻崇陽通城新昌上高六縣扼駐瑞州以通兩湖之路江西全局之轉機胥繫乎此所有帶兵得力之員應卽籲懇恩施以示鼓勵 上諭湖北援師攻剿瑞州屢次獲勝楚軍見駐瑞州以通兩湖之路所有帶兵文武各員均能奮不顧身冒險攻擊自應量予恩施湖北補用參將普承堯著以副將遇缺卽選湖南候補同知吳坤修著以知府歸湖南補用同知銜曾國華著以同知儘先補用候選知縣

劉騰鴻著以直隸州知州歸江西補用並賞給衝勇巴圖魯名號其餘出力員弁著准其擇尤保奏○諭軍機大臣等怡良趙德輿何桂清奏江浙旱災已成請招徠臺米以資接濟一摺本年江蘇浙江兩省入夏以來雨澤稀少蘇常杭嘉湖等屬被旱尤重早禾既皆黃萎晚稻未能插蒔以致米價騰貴民食兵糈均虞缺乏自應暫弛海禁招徠臺米以資接濟即著王懿德呂佺孫飭知臺灣鎮道速即出示招商販運米石由海道運至江蘇之上海浙江之乍浦甯波等海口售賣即由臺灣道發給執照准其免稅以期商情踊躍源源轉運毋稍遲誤將此由六百里諭令知之○諭前因廉兆綸奏甯都會匪竄陷廣昌等四縣廣信危急諭令曾國藩文俊速派大員帶兵赴剿並諭何桂清兼顧常開後路本日據何桂清奏玉山防所見畱遊擊高士濬帶兵一千一百名駐守又派候

補知府王慶勳帶勇七百名江蘇候補同知俞斌帶勇六百名赴常山防堵三衢門戶已臻嚴密惟廣信倉卒聞警初無準備見據何桂清奏饒廷選到郡後與署知府沈葆楨合籌防剿殺賊多名尙爲得力江西並無兵勇會剿專恃客兵恐難應手饒廷選一軍旣抵廣信俟賊匪擊退自應設法將失陷各縣次第收復而兵力尙單著會國藩文俊卽遵前旨酌派大員帶兵前往會同饒廷選克復被陷各縣並著何桂清飭知饒廷選如廣信賊蹤敗退卽帶兵前進會合江西派出之軍務將被陷各城收復再行回駐玉山將此由六百里各諭令知之○諭會國藩文俊奏湖北援師餉銀缺乏請飭山陝兩省按月接濟並由江省派員赴荊州守候等語江西八郡淪陷錢漕無從辦理各軍餉需久缺見在湖北赴援之師直抵瑞州連獲勝仗江省軍務藉望轉機惟餉銀已欠發兩月

有零若不速籌放給深恐師氣餒乏近日山陝兩省撥款甚多按月籌解亦恐力有未及著王慶雲吳振棫無論於何款項下每月各籌銀三萬兩暫解數月並派委妥員解赴荊州卽交江西委員接解前進以資接濟將此由五百里諭令知之○予江西殉難按察使周玉衡祭葬世職建祠知府陳宗元等祭葬世職附祀○會國藩文俊奏六月十四日楚軍擬於撫州西南城根隄下築一新壘以截賊蹤而窵隧道以爲蕞城之計賊卽併力來爭我軍抵陣衝鋒殺賊四十餘名隄上之賊復經江軍轟斃數十名二十日楚軍仍於西南城隄上潛築新營再掘隧道賊疊次來撲我軍攻剿屢勝七月初一日探報逆目黃玉琨黃士幅等由臨江崇仁統賊七千餘人冀圖與郡城悍賊內外夾攻猛撲我軍老營然後併力以西禦兩湖來援之師是夕至上頓渡民房占踞我軍於初二日

五鼓派隊馳剿逆黨四千餘人已於四更時潛伏卡外我軍行抵該處賊分三路包來周岐山等分鈔夾攻殲賊二百餘人追殺二百餘名黃玉崐僅以身免當各軍乘勝追捕之時城內突出二千餘賊以數百人犯江軍以數百人犯掘隧之新壘以千人犯楚軍之中營均被我軍擊退是日自卯至午鏖戰四時共殺賊五百名積屍十餘里初十日黎明賊黨三四千人出犯中營我軍併力衝突賊始退至隄邊旋猛撲新壘緣新壘之中開挖兩隧賊黨偵知特用全力圍逼忽值大雨如注我軍槍礮皆不能然賊遂撲入力戰一時之久不能奪回次早賊復大至各營堅壁不動待其疲乏一擁而前賊出不意潰至隄根我軍用排礮轟擊血戰半日殲賊四百餘名十三日寅刻賊卽吹角出城火光遍野黎明分三路來犯中左右三營我軍先用大礮轟倒八九名賊仍不退時督隊之

賊左突右衝大隊皆受其指揮突被礮轟落馬遂狂奔入城是日賊黨數千人出北門過西津渡竄去人數約六千餘悉赴瑞臨以禦兩湖之援師由是撫州之賊數稍減我軍久戰力疲亦少資休息目下兩湖援師已至瑞州賊勢全注西路臣等仍飭李元度圍逼撫城力圖克復以期肅清東路又奏三月初間逆首石達開竄擾皖南帶去男婦一萬餘人然所帶者多係江西新擄之民非盡兩廣久從之賊江西賊勢仍未稍衰八郡名城久被淪陷南康雖經收復尙無陸兵駐守刻下贛州建昌饒州三府各有兵勇數千撫州瑞州袁州三府各宿重兵將近萬人查閱僞文參覈各處探報賊首之在江西主持軍務者自去年十一月至本年二月底以僞易王石達開爲主三四月以僞易貴丈黃玉崐爲主六七月以僞北王韋昌輝爲主如九江之林啟容瑞州之賴積新湖口

之黃汶金皆著名劇賊撫州之三檢點建昌之張三和袁州之李能通雖不甚著名亦復詭謀百出堅悍異常統計江西境內廣西悍賊與廣東湖南新附之賊約在四萬以外本省甘心從逆之匪約在三萬以外而皖鄂兩省上下往來之賊不在此數臣等忝列戎行惟當一意鎮靜妥爲布置以安軍民之心均報聞○壬子閩浙總督王懿德等奏江西賊氛甚熾請畱署副將琳潤一軍扼守邵武得旨所奏尙係實情著准其暫畱琳潤在邵武一俟江西援兵會集匪勢稍鬆仍應飭令該員迅赴江南大營○癸丑諭軍機大臣等蔣霽遠奏古州廳城失守請飭湖南省派兵救援黎平一摺貴州黎平府古州廳城於七月二十三日失守據稱四川副將蔣玉龍一軍見在鎮遠勦辦苗匪黔省官軍又在都勻麻哈等處勦匪均難兼顧黎平該郡見甚危急自係實在情形湖南靖州與

黎平接壤赴援較便著駱秉章迅卽派調永州靖州一帶官兵由靖州馳往救援如該處兵力不敷卽著酌撥練勇以資協剿毋稍遲延將此由六百里諭令知之○甲寅諭內閣桂良奏查勘各州縣被蝗被旱被水一摺據稱直隸永平保定等府屬二十八州縣飛蝗停落搜捕淨盡早禾多已成熟收割惟晚禾穀豆間有殘食於收成大局並無妨礙其被旱之大名等府州所屬十七縣被旱兼被水之大名等三縣被水之通州等四十一州縣內惟開州東明長垣固安永清東安六州縣情形較重業已籌款撫恤仍著桂良速飭該地方官勘明災歉分數分別蠲緩賑恤奏到時再降諭旨如查有勘報不實之員卽著從嚴參辦以副朕軫念民瘼至意○貸福建福甯南澳二鎮兵丁穀價銀○是月減免江蘇下砂頭等六場並直隸東光縣被擾地額賦蠲緩廣西象州等四十四

應州縣被擾地方額賦